

محمود السعدني الأعمال المسرحية الكاملة



الجزء الأول

- عزة بنيوتي
- سر حبه سحر فخرية فخر
- بين النهدين
- سر حبه سحر فخرية فخر
- النصابين
- سر حبه سحر فخرية فخر
- الأورنس
- سر حبه سحر فخرية فخر

<http://arabicivilization2.blogspot.com>

الهيئة المصرية العامة للكتاب



الأعمال المسرحة في الكاظمية

محمود السعدني

الجزء الأول

□ بين التهادين

سرمية من ثلاثة فصول



الطبعة الأولى: ١٩٩٥

الفصل الأول

المنظر : ميدان فى حى شعبى تتصدره قهوة بلدى ٠٠ مدخل القهوة
دكه خشبية فوقها جثة ضخمة مغطاه بملاية سرير ٠٠ على
مقربة من الدكة عدة كراسى وطاقاطيق ٠ فى مواجهة القهوة
بيت يفصل بينه وبين القهوة حارة صغيرة ذات سلالم
عتيقة توحى بأنها من عصر غابر ٠٠ البيت مكون من دورين
٠٠ الدور الاول تسكنه أسرة توكل افندى المدرس الالزامى
الذى يعمل بامارة بين النهدين ٠٠ فى الدور العلوى تقيم
أسرة المعلم عزوز ٠٠
(عند رفع الستارة)

عتقر : وله يا جريولى ٠٠ وله يا جريولى ٠

جريولى : عاوز ايه يا زفت انت

عتقر : دأ توكل ح يوصل النهارده ٠

جريولى : تشرفنا يا اخويا ٠٠ يعنى سبع البرمبة ح يوصل ٠

عتقر : يا واد ده باعت لمعشوق افندى جواب ٠٠ انه راجع من بين

النهدين وجايب معاه عربية مرشيدس وفلوس ٠ وشأى
وجبنة سستر ٠

جريولى : وفرحان قوى كده ليه ٠٠ يعنى كان من قرايب المرحوم ٠

داهية تاخذك (للزبون الناشم على الترايبزة) وله ٠٠ انت
يا وله ٠٠ وله ٠٠

- الزبون : بسم الله الرحمن الرحيم .. ايه ياواده ده ..
 جريولى : قوم عمك توكل راجع يا وله .
- الزبون : يعنى تصحيتى من النوم وقلقت منامى علشان تقوللى توكل راجع .. ما يرجع والا يغور فى ستين داهية .. يعنى ابو زيد الهللى راجع .
- جريولى : ده بيقولك راجع ومعاه عريية مرشيدس وجنيهات ذهب .. جايب معاه قفه كلها ذهب .
- الزبون : ذهب والا صفيح .. احنا يعنى حناخد منه حاجة .. ده حتى جلده وطول عمره عره وجعان .. اتهووى بقى كده وخلىنى انام ..
- جريولى : تنام .. حد قالك ان احنا فاتحينها اكاندة .. دى قهوة يابنى آدم ..
- الزبون : ما انا عارف انها قهوة .. ولسه شارب شاي مافيش خمس دقائق ..
- جريولى : يقالك خمس تيام ..
- الزبون : طيب ماليش مزاج اشرب .
- جريولى : ده مش بالمزاج .. الشروب اجبارى بأمر المعلم .
- الزبون : ايه اوامر المعلم
- جريولى : لازم تشرب حاجة
- الزبون : خلاص .. روح هاتلى كوباية ميه .
- جريولى : (يشده من جلبابه بعنف) تسمع تتكرت من هنا .
- الزبون : انت بتزقنى .. طيب والله لاوريك .
- جريولى : ابقى ورينى زى مانت عاوز .. بس دلوقتى اتهرى من هنا
- الزبون : والله لاكون قاطع رجلك من هنا .. علشان ماحدش واقف حال القهوة غير افعالك السوده دى .. حد يطرد الزباين يابهيم .. بس لما اشوف المعلم .
- جريولى : انت هتتجر من هنا بقى والا اعملك زرع بصل فى الميدان .
- الزبون : (وقد وقف وسط المسرح) انا واقف فى الشارع انت شريكى .
- جريولى : لا .. ماتقفش فى الشارع .. يلا امش من هنا .

- الزبون : (يجلس على عتبة البيت) وادى قميده .
 (تدخل فواكه وهي سيدة في الثلاثين تبيع اليانصيب)
- فواكه : اسماعف .. الدبة .. النصيب .
- الزبون : تعالى خدي يا بت .
- فواكه : نعمين ..
- الزبون : مادرتيش .. مش توكل افندي راجع .
- فواكه : توكل مين يا ادلعدي .
- الزبون : المدرس الالزامى .. الراجل الايمه التعبان اللي ما يسو
 تكله .
- فواكه : آه .. وراجع منين يا ادلعدي .
- الزبون : من بين النهدين .. قعد له هناك سنتين .
- الزبون : ده أنا معايا نص ورقة وقلبي بيقول انها كسبانة .
- فواكه : خلاص .. مادام كشفت عليها بقلبك عاوز ايه .
- الزبون : طيب وريني الورق اللي معاكي .
- فواكه : انت ح تشتري والا ح تدلع ..
- الزبون : والنبي انا نفسي اتدلع .. نفسي .. ده انا ح تدلع على
 روحي يابت ..
- فواكه : يا شيخ شوفلك نقره ادفن فيها نفسك .. جاتها خيبة اللي
 سحبت رجلك . (فى اتجاه القهوة .. الدبة .. اللوتارية
 .. يانصيب .. الدبة .
- جربولى : اهلا بالدبه ..
- فواكه : دبه لما تاكل مصارينك .. اهو ده اللي انت شاطر فيه ..
 عمله توكل العجوز اللي ما بيقدرش يمشى بيقولوك راجع
 من بين النهدين وجايب معاه عربية دهب .
- جربولى : وهو فيه عربيات دهب انتى رخره ..
- فواكه : اهم الناس كلهم بيقولو كده .. وبيقولوا ان الذهب هناك
 ببيوعوه على العربيات .
- جربولى : أنا سمعت كده برضه .. بيقولوا الراجل بتاع الذهب
 بيبقى سارح بالعربية ويغنى على البضاعة (يغنى) ولا تين
 ولا عنب زيك يا دهب يا اصفر يا حيانى يا رطب .

فـواكه : انت بتتمالس عليه .. والنبي تتوكل كده .

جـريولى : يابت انا باقولك كلام مضبوط والله .. هو انتى فاهمه
ان الذهب بس اللي بيعمره على المربيات .. دا الذهب
والفراخ واللحمة كان .

(يدخل المسرح معشوق أفندى وهو رجل عجوز لامع اتيق)
معشوق : يا مساء الأنوار .. مافيش كده .. يابخت اللي يكسب
.. وريتى الكشف يا حلوه .

فـواكه : من عنيه حاضر .

معشوق : اعمل واحد شاي ميزة للمست فواكه .. ومات لى قهوة
ساده ..

جـريولى : من عنيه حاضر .. من حق توكل أفندى راجع النهارده
يا معشوق أفندى .

معشوق : ده مين اللي قالك ياوله .. عجائب . هيه حارتمك
ما يتبلش فى بقها قوله .. مين اللي قالك .

جـريولى : الحة كلها بتقول انه بعترك جواب انه راجع النهاردة وانه
جايب معاه عربية ذهب وموتوسيكلات ذهب وعجلة ذهب
وجزم ذهب .

معشوق : وهو فيه جزم ذهب يا حافى .

جـريولى : طيب بالذمة مش راجع ومعاه الحاجات دى .

معشوق : ماهو مادام رجوع من بين النهدين يبقى معاه حاجات كتير
.. برفانات .. حرير .. عربية مرسيدس .. جزم
ساكسون .

جـريولى : جزم ساكسونيا .

معشوق : ساكسونيا ايه ياواد .. امشى انجر ماتلى كوپاية ميه .
(فواكه تحاول أن تأخذ الكشف) ماتتعد يا غزال .

فـواكه : هه .. (تجلس) والنبي وسطى زاي مايكون هينقلم .

معشوق : سلامة وسطك يا سنيورة (متظاهرا بالنظر فى الكشف)
الى زيك لازم يرتاح .

فـواكه : وحزرتاح فين يا حسرة .

معشوق : فين ازاي ؟ .. الشقة عندى ترد الروح .. عندى اودة

صيفى عليها سقف ، كفاية كدة الواحد ينام على ضهره
ويبص لفوق

فـواكه : جرى ايه ياسى معشوق أفندى

معشوق : اسمعى كلامى يا بت .. دنا مابصش الا للحاجة الحلوة
.. ياما ستات كتير فى الحنة تتعنا ابصلها بصة *

مـواحه : احنا مش من الستات دول ياخويا .. هات الكشف خلىنى
اشوف حالى *

معشوق : طب متزعليش .. اقمدى
(تظل نبوية زوجة المعلم عزوز وهى فى حوالى الاربعين
من عمرها)

نبـوية : يا معلم .. يامعلم عزوز ..

جـريولى : ايوه ياست عاوزه حاجة ..

نبـوية : انت يالملى ينقطع لسانك من اللغلوغ .. المعلم فين ؟

جـريولى : هايكون فين يعنى ؟ مطرحه ..

نبـوية : قولله قوم انشا الله تقوم قيامتك ..

جـريولى : هو منبسه عليه ما اقوللوش قوم ابدأ ، هو يقوم على
مزاجه ..

نبـوية : مزاجه ، روح الهى تتمزج فى نار جهنم .. انت يا معلم ،
معلم عزوز ..

المـعلم : يوه هه (ينهض من رقدته على الدكة) عاوزين منى ايه *

نبـوية : عاوزين سلامتكم .. انت خلاص سكتت عندك فى الدكة
دى .. ما تطلع يا معلم *

المـعلم : يعنى اسيب شغلى واطلع ..

نبـوية : وهو فين شغلك ده ؟ يعنى ما شاء الله الزباين مقطعة
بعضها قوى ، الليلاى ليلة الجمعة والا انت ناسى ..

المـعلم : يوه .. قلتك مش منقول من القهوة لما اشوف شغلى الاول ،
أما احاسب ابقى اطلع (بصوت منخفض) ثم انا تعبان ..

نبـوية : ماتحاسب الصبح .. يعنى الدنيا طارت ..

المـعلم : يعنى اسيب المارك مرمى لحد الصبح ، دا جنان ايه بتاع
الولية دى ..

ثبوتية : طيب يا خويا ، خليك قاعد جنب المارك ، احسن المارك ما
يطير ، مبروك عليك الجوزة الجديدة ، ما دام ربنا سهلك
واتجوزت الدكة ربنا يهدى سرکم ، جاتها وكسة رجالة
(تدخل) *

(يرمى عزوز الملاية بعنف ع الأرض)

عزوز : تعالى يا واد يا جربولى ..

جربولى : نعمين يا معلمى ، اعملك شأى ..

عزوز : (يجلس القرفصاء على الدكة) ادعك لى هنا يا واد (مشيرا
الى ظهره) (يدعك جربولى) قوى .. قوى .. فى الحنة
دى ، ايوه ، الله ، تحت شوية ، قوى يا بن التبعانة (يضربه)
امال جرسون ايه يا ابو طويلة باقولك ادعك لى مش
اهرشلى ، جراسين ايه يتوع اليومين دول ..

معشوق : دول شوية برد يا معلم ..

عزوز : معقول برد ، هو البرد مايبطلعش ايدا ، برد ايه دا ، ما
تدعك يا بهيم

جربولى : (يدعك بعد توقف) *

فواكه : دا عجز ياس معشوق افندى .. المعلم مايقاش فيه مروة ..
عزوز : الاكاده عليكى سحنة تقطع الخميرة م البيت .. واللى
خلق الخلق ما يملا عينى اربع نسوان زيك .. انت فاهمة
انك حلوة ..

فواكه : (ضاحكة) طيب اطلع فوق ما دام بطل قوى كده ..

عزوز : انا ميت مرة قلتك ماتهبيش ناحية القهوة دى (يضرب
جربولى) وميت مرة قلتك ماتدخلهاش القهوة .. انا معلم
خينة والا ايه (يشخط) كلامى لازم يتسمع وامرى لازم
يتنفذ ، كمان دى مش من وامك يا معشوق افندى تقعددا
جنبك .. انجرى امشى من هنا ..

فواكه : طيب حاسب كده على مهلك .. المعلم صحيح اللى عاوز
يشخط وينظر يطلع ، والا بتتعب م السلم يا معلم (تغادر
المسرح وهى تضحك) ..

عزوز : قلة ادب ، حريم عينها تندب فيها رصاصة .. قليلة الحيا ..
(يدخل جبر تاجر شنتة فى الاربعين يرتدى جلباب سكرونة
وجزمة كوتش ويمسك شنتة)

- جبر :** كنك ٠٠ كنك معايا سجاير كنك ، صوف هيلت شغل برة
٠٠ مساء الخير يا معشوق افندى ٠٠
- معشوق :** مساء الخير يا واد يا جبر ٠٠
- جبر :** معايا خرطوشتين كنك ، انما يستهلوك ٠٠
- معشوق :** على كام يا واد ؟
- جبر :** ٢٧٠ الخرطوشة ٠٠
- معشوق :** هتاخذ الخمسة جنيه وتسيبهم ، كان بها ٠٠ مش عاجبك
وريني عرض كتافك ٠٠
- جبر :** دول مش صغيرين ٠٠ دا كنج سايس ٠٠ السجارة تضرب
فى النافوخ عدل (يلتفت لعزوزن) مساء الخير يا معلم ٠٠
- المعلم :** مساء الزفت عليك وعلى اللى جابوك ٠٠
- جبر :** الله ٠٠ انت زعلان ٠٠ حصل حاجة منى لا سمح الله ٠٠
- المعلم :** يعنى حنة طلب طلبته منك بقالى سنة ما انتش شاطر غير
فى الكنك ويس ٠
- جبر :** واللى خلقك طلبت طلبية مخصوص علشانك انت ٠٠
- المعلم :** ايه ٠٠ ويقالهم سنة بيعبوا فيها ٠٠
- جبر :** الصنف اللى طالبيهولك بالذات شاحج م السوق قوى لانه
دا اللى فيه البركة ، سييك من اى صنف تانى ٠٠
- معشوق :** وايه الطلب دا يا معلم ؟
- المعلم :** لا ٠٠ دى حاجة كده من غير مؤاخذه ، شغلانة يعنى ،
حاجة علشان الكرش ، تضيع الكرش يعنى ٠٠
- جبر :** وهو معشوق افندى غريب ، ماتقولله ، ماهو راخر زبون
المعلم طالب بازوكا ٠
- معشوق :** البازوكا دا مدفع يا وله ٠٠
- جبر :** الدوا اللى بتاكل منه ، اللى بيرم العضم ٠٠
- جبر :** آه ٠٠ البازوكا قصدك ٠٠
- جبر :** ايوه ده ٠٠
- معشوق :** طيب وماجبتلوش ليه يا واد ما كان معاك عابيتين اول
امبارح ٠٠
- جبر :** دول كانوا بتوع واحد زبون ، والله ماكانوش للبيع ٠٠

- المعلم** : دا اصله رمة ..
- جبر** : صبرك بس يا معلم ، واللى خلقك ماكانوا بتوعى ..
- معشوق** : انت حاسس بايه يا معلم ؟ ضعف يعنى ..
- المعلم** : فشر .. واللى خلقك انا اجمد من خمسين عيل ، صغير عنده عشرين سنة ..
- معشوق** : امال عاوز الحاجات دى ليه ؟
- المعلم** : علشان ضهرى ، انت يا واد يا جربولى ..
- جربولى** : نعمين يا معلمى ..
- المعلم** : تعالى يا واد ادعك لى الحقة دى ..
- معشوق** : يخرج علبة حبوب من جيبه يناول منها واحدة للمعلم ، على العموم دى احسن م البازوكا ، حاجة اجمد .. دى زومبا ..
- المعلم** : يا سلام .. ودى تعمل مفعول باذن الله (ينظر لجربولى) تحت ياوله .. آه .. ايوه الحقة دى ، الله ، ايوه ..
- (يتوقف ويضربه المعلم بالقلم)
- معشوق** : دى تاخدها وتشرب شاي ، وياسلام لو شوية شوربة سخنين .. ساعة بس والا ساعة ونص ، متلايك طالع السلم جرى وبقلب قوى باذن الله ..
- المعلم** : اعمل كباية شاي يا واد يا جربولى (وهو يبتلع الحبة) بس ربنا يجعل فيها القبول ..
- معشوق** : اسألنى انا ..
- المعلم** : ادعك يا واد يا جربولى ، خلى عندك مروة وانت خيخة كده ، رجالة ايه العرة دول ..
- جبر** : قلت ايه يا معشوق افندى ..
- معشوق** : خمسة جنيه .. تاخدكم ولا تتهوا ..
- جبر** : طيب خليه ستة ..
- معشوق** : خمسة جنيه اهم .. خلصنا ..
- جبر** : انت مايخلصكش اخسر .. مش عاوز يا معلم ؟
- المعلم** : مش عاوز حاجة من وشك ..

(يدخل زينهم)

- زينهم : مساء الخير يا معلم ..
- المعلم : اهلا .. ازيك يا واد يا زينهم ..
- زينهم : ازيك انت يا معلم .. لسه قاعد ع الدكة ..
- المعلم : امال عاوزنى اعمل زيك وادور اتمشكح فى الشوارع ..
- زينهم : يا عم خلاص .. لا شوارع ولا قهاوى بعد كده ، الحمد لله ربك تاب علينا خلاص وقرجت ..
- المعلم : ايه يا واد ، كسبت البريمو ؟
- زينهم : لا كسبت شغلة ..
- ممشوق : مش غايته غفير على عمارة ..
- زينهم : عمارة ؟ عمارة ايه يابيه ، اسبوع واحد وشرطك وها اسافر ..
- المعلم : ايه راجع بلدكو تانى يا وله ..
- زينهم : رايح بين النهدين ، اتفقت النهاردة مع عثمان اسافر بين النهدين ..
- المعلم : عثمان مين ؟ المخدماتى ..
- زينهم : مخدماتى مين .. عثمان احمد عثمان ..
- المعلم : شوف ياخويا الافترا بتاع العيال الصيع ، بقى انت ياقيحة انت اتفقت مع ام المقاولين العرب ..
- زينهم : واللى خلكك النهاردة كان بيتحايل على ، مش النهاردة بس ، دا بقاله ست شهر بيتحايل على ، لكن انا بقى ماكانش ليه مزاج لكن لما سمعت ان الراجل توكل راجع من بين النهدين وجايب معاه شولة ذهب قلت اشمعنى انا ، والله لرايح ..
- المعلم : مين اللى راجع ؟
- زينهم : توكل افندى ، انت ماعرفتش ..
- المعلم : لا ماعرفتش ..
- زينهم : دا بعث جواب لممشوق افندى وقال له على كل اللى جايبه معاه ، وبيقول لك جايب بدل ذهب وجرافات ذهب ومراتب ذهب ، بيقول لك وقع على كنز يا معلم ..

المعلم : طيب ازاي يا معشوق افندي ماقلتليش ..

معشوق : والله من خوة دماغى يا معلم الواحد ماهوش دارى
بيعمل ايه النهاردة ..

جبر : وهو معقول الجمرك هيخليه يقوت بالحاجات دى ..

المعلم : والجمرك ماله ما دام يجمرك خلاص يخش انشالله
يارب يكون جايب مراكب دهب ..

المعلم : طيب وهايديوك كام يا واد فى الشغلانة دى ..

زينهم : ميت دينار والسكن بلاش وكثير ست اشهر ..

المعلم : طيب اسمع يا واد تجيب لى معاك دوا اسمه بازوكا تجيب
علبة والا اتنين وانت جاي ..

جبر : انت بتقول انك مسافر بعد اسبوع ..

زينهم : كل شىء تمام ان شاء الله ..

جبر : طيب اشوفلك كام دينار وكام جنيه استرليكى عشان تجيب
شوية حاجات وانت جاي .. وهى لقمة وناكلها سوا

معشوق : وان جيت عربية وانت جاي اشتريها منك ..

المعلم : والله عال يا زينهم ، ربنا هايوتوب عليك م السجاير الفرط،
وم الرمية طول النهار ع القهوة متروح بين النودين يابن
الخابية واحنا قاعدين هنا زى الولايا ، دا آخر زمن واللى
خلق الخلق (ينهض واقفا) عن اذنكو اما اروح اصرى ..

(تنتظر زوجته من فوق)

نبوية : يا معلم ..

المعلم : (بغضب) نعم ..

نبوية : انت مش طالع فى ليلتك دى والا ايه ؟

المعلم : دى ليلة ايه السودة دى عاوزة منى ايه ..

نبوية : عاوزاك تطلع ..

المعلم : رايح اصرى ..

نبوية : ماتطلع صلى فوق ..

المعلم : بقى حد يسبب الجامع ويطلع يصلى فوق ، فى شرع مين
دا بقى ..

ثبوية : يعنى الصلا حبكت قوى ، ما انت بقالك ييجى شهر
ما بتصلش .

المعلم : خلاص تاب عليه النهاردة على رأى المثل اللى يعوزه البيت
نبوية : طيب روح والنبي صلاتك ماهى نافعة .

المعلم : وانت محتاجة صلا .. معذورة فى ركعتين ..

ثبوية : اهو انت مش نافع غير فى النأورة والهزار ، جتها وكسة
رجالة ..

المعلم : (يضرب بالكف ويوقف غاضباً ثم ينادى) خد يا واد ..
جربولى : نعمين يا معلمى ..

المعلم : (يضربه بالقلم) خد بالك من القهوة (ينصرف)
الشأى يا جربولى وتدخل البيت ..

(تدخل بنت شوارع بلدى تتكلم وتتشبه بأبناء الذوات)

البنت : سلامات عليكى ..

معشوق : اتفضلى يا افندم (يقدم لها كرسى)

البنت : ازيك .. انت ..

معشوق : اهلا يا ست هانم ..

(تتبعد وهو يتجه اليها مصافحاً ويقبل يدها)

خدامك يا ست هانم ..

البنت : الشارع دا فايت ..

معشوق : شارع ايه وفايت ايه .. انت كنت عاوزه حاجة أنا
خدامك ..

البنت : الشارع دا مفتوح والا مقفول .

معشوق : لا بيفوت .. يا ست هانم ..

البنت : اصل أنا تايهة ..

معشوق : تعالى يا سنيورة ، تعالى لما اوريكى السكة ..

البنت : مرسى يا انت ..

(معشوق وييده الخراطيش ويهم بالانصراف)

جبر : معشوق بيه .. الفلوس ..

معشوق : فلوس ايه يا واد انت ..

جبر : حق الخراطيش الكنك ..

- معشوق : عاوز كام ٠٠
 جبر : ستة جنيه ٠٠
 معشوق : عشرة جنيه ايه مات خمسة ٠٠
 جبر : اربعة بس ٠٠
 معشوق : طيب مات جتك داهية ٠٠
 جبر : مامعيش فكّة ٠٠
 معشوق : طيب خلى الفكّة دلوقتى غور فى ستين داهية ، اتفضل
 يا ست الستات ٠٠
 (يتصرف معشوق والبنت بينما يبقى جبر وسيد)
 جبر : يا سلام عالم نجسة ، تموت على المليم ، ولما تشوف ديل
 فستان يا لعشرة ٠٠
 زينهم : واللى خلقك انا مافيه حد يملأ عينى ابدأ ٠٠
 جبر : جتك نيلة وانت فيه ست ترضى تبصلك ٠٠
 زينهم : واللى خلق الخلق ياما نسوان ماتت فى محسوبك ٠٠
 جبر : ماتت من القرف جتها نيلة اللى تقع قرعتها فيك ٠٠
 جبرولى : يا واد الرجالة اسرار ، طيب مش المعلم عجيب منظره قوى
 ايه رايك ان الضعيف اللى قدامك ده قد المعلم عشرين
 مرات ٠٠
 جبر : والنبي انت كداب زى زينهم ٠٠
 (يحط شنطة زينهم استعدادا للانصراف)
 زينهم : على فين العزم ٠٠
 جبر : معايا معاد مع بنت ارتششت ٠٠
 زينهم : ارتششت ٠٠ !
 جبر : آه ٠٠ بنت من بتوع الروميا بيسموها ارتششت ٠٠ حكم
 ٠٠ شغلة النصب شغلة السيما دى ، ابوه الواحدة من دول
 تلاقيها ممصوفة والصفار بينقط منها وجريانة زى حالاتك
 كده ، وتحط الاحمر والاصفر وتليس البروكة على راسها
 وتقصّر ديل الفستان ، تطلع ارتششت على طول ٠٠
 زينهم : والارتششت دى تعرفك انت يا تعبان ٠٠
 جبر : هى ختعرفنى يعنى واقعة فى غرامى ، دى موصيانى على
 شوية ملابس حريمى ٠٠

- زينتهم : طيب روح اياك تلهفهم منك ببلالاش ٠٠
- جبر : مين دى ، الحاجة ام جنيه بتاخدها بخمسة ، فلوس زى الرمل يا جربولى واللى خلق الخلق ٠٠ ومعاه واد ارتشت انا امثل احسن منه غيرش حظوظ ٠٠
- زينتهم : مين عارف يمكن الحظ يضرب معاك وتبقى ارتشت انت راخر ٠٠
- جبر : خليك قاعد اياك الجرب ياكلك ٠٠
- (ينصرف جبر ويقرب زينهم من الجربولى)
- جربولى : انت رايع بين النهدين صحيح ٠٠
- زينتهم : امال رايع كذب يا واد ٠٠
- جربولى : طيب ماتشوف لى شغلة معاك ٠
- زينتهم : كمان انت عاوز تسافر بلاد بره ٠
- جربولى : وهى بين النهدين دى بلاد بره ٠
- زينتهم : امال جوه ٠٠
- جربولى : طيب دانا سمعت انها زى هنا بالمظبط ويقولك السوق بتاعها زى السوق بتاع هنا بالمظبط وفيه لحمة وسمك وخضار وعيش كمان ٠٠
- زينتهم : امال انت فاهم السوق بيقى فيه ايه ٠٠ طيارات ودبابات ٠٠
- جربولى : والنبي تشوف لى اى شغلة هناك وبس ٠٠
- زينتهم : وانت هاتشتغل ايه هناك ؟
- جربولى : اى حاجة ، قهوجى حتى ٠٠
- زينتهم : ماحدش ببسافر هناك الا الجامد فى صنعتة قوى ، يعنى كونى زى ماتقول ناس خبرا ٠٠
- جربولى : خلاص ٠ خدنى خبرا ٠٠ بس ماتقولش للمعلم ٠
- (تخرج نبوية من البيت متوترة الاعصاب)
- نبويه : (تنظر) هو فين المعلم يالملى تنقرص فى بطنك ٠٠
- جربولى : رايع يصلى ٠٠
- نبويه : راح يصلى والا رايع ورا الراحل النجس معشوق ٠٠
- زينتهم : (ضاحكا) يعنى ماشاء الله قوى ٠٠
- نبويه : بتقول ايه يا واد انت ياراد ٠٠
- زينتهم : (خائف) ماقلتش حاجة ٠٠

نبوية : ماتعد هنا باديك ، ماتعدش مقلع الشيشب واديك على
بورك على طول ..

زينهم : حد كلمك يا خالة نبوية .

نبوية : خالة ، روح الهى تتخبل فى عقلك ، قال خالة قال

زينهم : الله .. انت عاوزة تشتمينا وبس .
(تخلع الشيشب وتنهال على زينهم)

زينهم : آى .. آى .. آى .. يفر صارخا .
(الزوجة كالمجنونة تتلفت فى أرجاء المسرح ثم يقع بصرها
على الزبون الذى يجلس على جهة البيت)

نبوية : وانت عاوز ايه يا جدع انت ..

الزبون : عاوز سلامتك يا ست ..

نبوية : انشا الله يسلموك للخانوتى ، قوم فز من هنا ..

الزبون : وانا عملت ايه بس .

نبوية : انت ماتقوم وال لا ..

(تخلع الشيشب)

الزبون : حاضر ..

(يهرب مسرعا)

نبوية : انت يا واد يا جربولى ..

جربولى : (مذعورا) نعم ..

نبوية : اقفل المخروبة دى ..

جربولى : حاضر ..

(يبدأ فى تشطيب القهوة)

نبوية : (تنفسيها) قال علشان صايح قاعد على القهورة فاتحها لى

طول الليل وحياة شرف النبى يا انا يا هو الليلاى ..

(يفاجأ المعلم عند دخوله بجربولى يشطب القهوة ونبوية

فى حالة هياج)

المعلم : ايه ياواد الحكاية ..

نبوية : مافيش قهوة الليلاى ..

المعلم : مافيش قهوة ازاي .. واحنا لو قفلنا كل ليلة ماتقلش

الليلاى ..

نبوية : هاتقعد هنا باديك ، ماتقعدش هقلع الشبشب واديك على
بورك على طول ..

زينهم : حد كلمك يا خالة نبوية ..

نبوية : خالة ، روح الهى تتخبل فى عقلك ، قال خالة قال ..

زينهم : الله .. انت عاوزه تشتمينا وبس ..

(تخلع الشبشب وتنهال على زينهم)

زينهم : آى .. آى .. آى .. يفر صارخا ..

(الزوجة كالمجنونة تتلفت فى ارجاء المسرح ثم يقع بصرها

على الزبون الذى يجلس على جهة البيت)

نبوية : وانت عاوز ايه يا جدع انت ..

الزبون : عاوز سلامتك يا ست ..

نبوية : انشا الله يسلموك للخانوتى ، قوم فز من هنا ..

الزبون : وانا عملت ايه بس ..

نبوية : انت هاتقوم وال لا ..

(تخلع الشبشب)

الزبون : حاضسر ..

(يهرب مسرعا)

نبوية : انت يا واد يا جربولى ..

جربولى : (مذعورا) نعم ..

نبوية : اقلل الخروبة دى ..

جربولى : حاضسر ..

(يبدأ فى تشطيب القهوة)

نبوية : (تنففسها) قال علشان صابغ قاعد على القهوة فاتحها لى

طول الليل وحياة شرف النبى يا انا يا هو الليلاى ..

(يفاجا المعلم عند دخوله بجربولى يشطب القهوة ونبوية

فى حالة هياج)

المعلم : ايه ياواد الحكاية ..

نبوية : مافيش قهوة الليلاى ..

المعلم : مافيش قهوة ازاي .. واحنا لو قفلنا كل ليلة مانقفلش

الليلاى ..

- نبوية :** ايه بقى .. ليلة القدر ..
- المعلم :** توكل افندى وصل دلوقتى وجاى على البيت بالسلامة ..
- نبوية :** دا مين اللى قال الخبر دا .. يادلعدى ..
- المعلم :** الواد ابن اخته .. افتح ياواد القهوة .. وانت اطلعى كده علشان تلبسى وتقابلى الست مراته ..
- نبوية :** معنى توكل افندى ماهو غايب بقاله سنتين .. المقاش غير الليلة دى يوصل فيها .. داهية لما تاخده راخر .. طول عمرة وش نصايب ..
- المعلم :** ياويله اطلعى وبلاش تبرطيم ..
- نبوية :** ماتصلح نفسك انت راخر وتغير هدومك دى اللى قرحت وبقت زى الطين ..
- المعلم :** انا تعبان ..
- نبوية :** طيب ياخويا .. خليك زى مانت .. يا فرحتى بهدومك اللى تقرف دى ..
- المعلم :** الراجل مش بهدومه يا نبوية ..
- نبوية :** (تتظفر اليه متفجرة) امال الراجل بايه يامعلم .. بايه .. مابتدش ليه .. بايه يا معلم ..
- المعلم :** (يتحسس شاربته ثم يجيب بسرعة) الراجل يا نبوية .. بقلبه ولسانه ..
- نبوية :** طيب يا بر كليه .. قال بيتكلم بالروحى شالله يا بر كليه .. (تدخل البيت)
- المعلم :** ايه يا واد اعملك همه .. انت قلبك من ايه .. امال شباب ايه .. ونيلة ايه .. اعملك همه (يتظفر نحوه شذرا) اعملك همه يا ابن المسكة (ينهمك جريولى فى الرش) ويتجه المعلم ليجلس على الدكة ..
- المعلم :** تعالى هنا يا واد ..
- جريولى :** نعم يا معلم ..
- المعلم :** اكلمك تيجى هنا ياواد ..
- جريولى :** عاوز ايه يا معلم ..

- المعلم :** ملعون أبو الرش .. قلتك تعالى هنا .. (بعد لحظات)
اسمع يا واد ..
- جربولي :** نعم يا معلم ..
- المعلم :** الواد ابن نبوية اندمه قوله المعلم عزوز عاوزك فى حاجة مهمة قوى ..
- جربولي :** دا كان سهران يا معلم ليلة امبارح وتلاقيه مجيش النهاردة ..
- المعلم :** روح جره من الجلاية بتاعته وهاتو هنا .. لازم نعمل فرح لتوكل افندى النهاردة .. قوم ياللا بسرعة وانا حرش القهوة ..
- جربولي :** حاضر يا معلمى (ينصرف) ..
- نبوية :** (تظهر من البلكونة) .. متطلع يا راجل تغير هدمك لحد توكل افندى ما ييجى ..
- المعلم :** معنى اسيب الرش واطلع اغير هدمى ..
- نبوية :** متشوف اى حد يرش بدالك .. واطلع غير هدمك وانت بقيت عامل زى اللى سارحين بالبهائم .. يا راجل عيب كده تقابل توكل بالشكل ده ..
- المعلم :** مفيش حاجة تعيب الراجل غير جيبه يا نبوية ..
- نبوية :** (مستهزاة) طيب يا معلم .. الحمد لله اللى لك جيب ياخويا
- المعلم :** اللهم اخزيك يا شيطان .. دى ليلة ايه المهيبة ده .. يا وليه خشى البسى انتى علشان تقابلى مرات توكل افندى ..
- نبوية :** طيب متشخطش قوى كده .. اللى يشخط يبقى راجل ..
- المعلم :** (يحدث نفسه) اللهم اخزيك يا شيطان (يحدث نفسه) طيب حاضر يا ستى البسى حقك عليه ..
- (تسمع مزىكة من الخارج .. يدخل محمد طه وفرقة .. ويترك المعلم الرش الذى يكون قد ائهمك فيه .. محمد طه يبدأ فى الغناء .. اثناء الغناء يدخل عزوز بعد سماع صوت كلاكس سيارة)
- نبوية :** يامعلم عزوز .. يا معلم عزوز .. توكل افندى وصل ..
- المعلم :** يا الف تلتमित مرجبة ..
- (يظهر توكل افندى حاملا بعض الاشياء)

توكـل : امشى .. امشى ..

(يشير لسائق التاكسى وهو يمنحه بعض النقود)

المعلم : نورت يا توكـل افسدى ..

توكـل : حاجة تنرفز ..

المعلم : ليه هو اللى ييجى من بين النهدين يبقى متعصب كده ؟

توكـل : التاكسى .. آل التاكسى آل .. دى عربية عدمانه ..

التاكسى فى بين النهدين .. يا محترم مرسيديس .. مش صندوق زباله زى اللى جانبى هنا .

المعلم : يا راجل ولا تزعل .. حمد لله على سلامتكم ..

توكـل : دا اللى احنا شاطرين فيه .. وايه يعنى سلامتى ..
والتاكسى كان هيفصص عضمى !

المعلم : الله ؟ انت راخر عضمك تعبان ومفصص ..

توكـل : امال انا يا حكى مين ؟

المعلم : اهو انا كمان عضمى مفصص ولا باركب تاكسى ولا
باركب حلزونة ، يظهر الجو اليومين دول بيفصص
العضم .. امال فين الست هانم والست الصغيرة
بسلامتها .

توكـل : فى التاكسى ، مع الشنط ، ماهو حاكم دول ناس حرامية .

المعلم : اجرى يا واد يا جربولى هات الشنطة يا واد .

جـربولى : حاضر يا معلم ..

(يقفز جربولى خارجا من المسرح وتنزل الزوجة من فوق)

نبوية : (تصافح توكـل بحرارة ويصافحها بفور) امال زين المدام

توكـل : فى التاكسى ، اصل ماكانش مرشيدس ، فشفش عضمى
وعضمهم بعيد عنك .

(يبدو التفوز على توكـل ويدخل جربولى حاملا حقائب

والزوجة والبنت تدخلان مستهزأتان)

نبوية : (متجهة بفرحة الى الاثنين) يا الف تلتमित مرحبة ..

الزوجة : ربنا يسر حالك ..

سمرة : هالوطنط ..

نبوية : اسم النبي حارسها مين ٠٠
سمرة : انا يا ملنط ياي ، انت جاملانى ٠٠
نبوية : (تنظر اليها من فوق لتحت وتمعن النظر فى فخذيها العاريتين)
سمرة : انت مستغربانى ٠٠
(تدور نبوية حول سمرة فى دهشة)
سمرة : انت ليه عمالة تنفزانى ٠٠
نبوية : (تحدث نفسها) سبحان الله يا اخواتى ، الخلفة هى هى ،
 الشكل هو هو ، لكن الركب ماكنتش باينة بالشكل ده ٠٠
(تعيد النظر الى سمرة بنت توكل)
سمرة : اول كلمة تقوليها مظلوطاتى ٠
المعلم : ماتحت اللي على ايدك دا على الارض وتريج دراعك
 شوية ٠٠
توكل : مصفص او مفصقص اتحمل احسن ما يتكسر ٠٠
المعلم : ايه دى من غير مؤاخذه ٠٠
توكل : لادا ٠٠ دا مكسر ٠٠ خلاط يعنى ٠٠
المعلم : دا خلاط ايه من غير مؤاخذه ٠٠
توكل : خلاط سكر عصار يعنى ٠٠
المعلم : مش فاهم ٠٠
توكل : عاوز تعصر لمون برتقال حاجات زى كده ٠٠
المعلم : دا مايعصرش لمون دا اكتر من كباية كده ٠٠
توكل : امال عاوزين يعصر لمون يملأ الجردل ٠٠
المعلم : جردل ايه يابا واللى خلقك ان ماكان طشت مايكفينى ٠٠
توكل : ليه ما تفكريش فى المرشيدس ٠٠
قبوية : النهدين دى فيها بلاد زى مصر كده وفيها قهساوى
 وفلاحين برضه ٠٠
توكل : احكى فلاحين مين يا باشا ٠٠ تلاقىهم هناك راكبين عربيات
 على طول ٠٠

المعلم : ودى عربية عيال من غير مؤاخذه ..

توكسل : دا ديكور ودا بيت ، ودا آلة عرض - مانا لازم أجيب كل حاجة خصوصا الحاجات الكمالية ، تصور يا محترم تقوم من النوم الصبح تحلق دقنك بالكهربا ، تعمل مساج بالكهربا ، دى كلها مكن بالكهربا ، وبينى وبينك يا معلم جيت معايا كل حاجة بالكهربا .. احنا مش هانترقى الا لما نستغل الكهربا وكل واحد يحلق دقنه بالكهربا .. تاكسد كل شئ يبقى عال ..

المعلم : كهربية مين يا استاذ ، على النعمة إنا دقنى عاوزه فاس توكسل : مافيش حاجة مخيبانا وجاييلنا الكافية الا عدم تنظيم المواعيد ، هناك كل شئ بنظام تقوم الصبح فى ساعة معينة .. تفطر فى ساعة معينة .. تركب عربية فى ساعة معينة .. تروح الديوان فى ساعة معينة ، ثم تتوكل فى ساعة معينة .. دا ايه ده الدنيا متولع ..

المعلم : دا حتى النهاردة فيه خريف حلو ..
توكسل : يا سلام ، كمان بتسمى دا خريف ، امال جهنم تبقى ايه ..
المعلم : دا تلاقى جهنم دى فى البلاد اللى انت جاي منها ..
توكسل : لا يا محترم ، كل شئ هناك مكندش ..
المعلم : اغوم بالله ، ليه كده الشر بره وبعيد ..
توكسل : الشقة مكندشة ، العربية مكندشة ، المكتب مكندش ، الدكان مكندش .. الكندشة فى كل حته ..

المعلم : وعينى عينك كده ؟
توكسل : وايه يعنى مش فاهم ؟
المعلم : يعنى اللى عاوز يكندش هناك على كيفه ؟
توكسل : طبعا على كيفه ، وفيها ايه لا يكندش يا اخى ؟
المعلم : فيها ايه ازاي ، ودى تبقى بلاد دى ؟
توكسل : احسن بلاد طبعا امال عاوز تعيش من غير كندشة ..
المعلم : طيب انت .. اتكندشت ..
توكسل : طبعا ، انا ايه اللى بيخلينى اقعد فى حته مافيهاش كندشة ..
المعلم : (يخاطب نفسه) اخص عليك راجل .. كنت يعنى بتكندش مطبوط والا كندشة كدة على ما قسم ..

حكمت : يا سلام على الكندشة اللى هناك يا أم امام ، يا خرابى
على الكندشة يا خرابى ؟ ال ٢٤ ساعة قاعدة فى الكندشة .
المعلم : (صانحا على زوجته) يا أم امام .. يا أم امام .
نبوية : نعمين يا معلم ..
المعلم : اطلعى على فوق بقى ، اطلعى ، يللا .
توكسل : الله . ماهى مع الست يا أخى ..
المعلم : لا ياتوكل أفندى ، ماوصلتش الحكاية لحد كده ..
توكسل : واية اللى حصل ؟
المعلم : مراتك يا أخى ، ودا اسمه كلام ده ، بتتكلم على المكشوف
قوى ، انا ماجيش حريمى تفتح عينها ابدأ ع المشى
البطال ده ..
توكسل : هو ايه اللى حصل ..
المعلم : انتو يظهر بقيتو الفرنكة قوى . مراتك بتتكلم عن الكندشة
توكسل : وفيها ايه يا أخى ؟
المعلم : فيها ايه كمان ؟ ..
توكسل : طبعا ..
المعلم : لمر لقيتها بتكندش ، مافيهاش حاجة كمان .
توكسل : يا سلام ، دنا لما كنت أخذها واخرج كنت لازم أودبها حنة
فيها كندشة ..
المعلم : انت اللى كنت بتودبها بايدك ..
توكسل : يا سلام ، طبعا ..
المعلم : لا .. عن اذنك ، انت يظهر اتغيرت فى السننتين اللى غبتهم
دول (يرفع ذراعيه لفوق) استرهما يارب (ينظر لزوجته)
يللا يا أم امام .. ياللا ..
نبوية : ايه مالك يا معلم بتزق كده ليه ..
المعلم : ياللا على فوق ، عن اذنك يا توكل أفندى ..
نبوية : ياللا يا خويا ، ألف نهار ابيض يا معلم ..
المعلم : والمرة دى ماتبقيش تروحي عندها ابدأ ..
نبوية : مش لازم يا خويا ..
المعلم : اخص جاتها البله (يصعدان)

توكـل : كل حاجة تمام ..
 حـكمت : ايـوه ..
 توكـل : الشنطة القماش الانجليزى ، جبتها ..
 حـكمت : ايـوه يا توكـل ..
 توكـل : وشنطة البطاطين ..
 حـكمت : كل شىء مطبوط ، ماتفكرش انت .. ماتشغلش يالك ..
 توكـل : بس الواحد يفتح الدم ويحط شقاه فى شنط وبعدين تضيع
 حـكمت : لا مانستش ، ياللا يا جربولى (يدخلان البيت)
 (بينما جربولى فى التشطيب يلح نور شقة المعلم يظنا
 وترتفع ضحكات ناعمة تطلقها نبوية - وفى هذه اللحظة
 تدخل فواكه المسرح مسرعة)

فـواكه : واد يا جربولى ..
 جـربولى : عاوزة ايه يا بت ؟
 فـواكه : المعلم فين ؟
 جـربولى : يعنى المعلم ماشاء الله قوى ..
 فـواكه : يا واد قوللى المعلم فين ..
 جـربولى : فوق ..
 فـواكه : (صانحة) يا معلم عزوز ، معلم عزوز
 نبوية : (غاضبة جدا) ايه ياست عاوزة ايه فى ليلتك السوداء دى .
 فـواكه : المعلم فين ربنا يخليكى ..
 نبوية : انت هاتنجرى من هنا والا انزل ارقعك ميت شبشب على
 نافـوخك ..

فـواكه : اندهيله احسن حصلت مصيبة ..
 المعلم : يطل من الشباك مصيبة ايه يابـت ؟
 فـواكه : معشوق افندى ، معشوق افندى ..
 المعلم : ماله ..
 فـواكه : مات ..
 المعلم : بتقولى ايه يابـت ؟
 فـواكه : بقولك معشوق افندى مات ..

المعلم : استنى يابت أوعى تنقلى ..

(يهبط المعلم الدرج لاثنا) .. بتقولى ايه يابت ..

فواكه : معشوق افندى يظهر كان معاه حد فى البيت حد غريب
يعنى وبعدين الناس شافوها وهى بتجربى افتكروها سرقت
حاجة ، جريوا وراها ومسكوها قالتلهم ابدا .. انا ماليش
دعوة هو الى مات ..

جربولى : ايه .. دا كان معاه واحدة ست لقطها وهو قاعد هنا ..
المعلم : يعنى شاب نطل قروى ، جته داهية ، جته داهية . جساب
الكافية لنفسه يستاهل ..

(ينادى يا نبوية .. يا ام امام)

نبوية : نعمين ..

المعلم : ارملى العباية ..

نبوية : ليه ؟ رايح فين يا معلم .

المعلم : الراجل معشوق اتوفى .

نبوية : اتوفى ، والا راح فى داهية ، اطلع ارقد الصباح رباح ..

المعلم : يعنى اسيبه واطلع ارقد جنبك ..

نبوية : لا مايصحش ، ياخويا روح .. بقيت حانوتى الحنة -
مبروك عليك الشغلانة الجديدة ..

المعلم : ارمى العباية وبلاش تبرطيم ..

نبوية : دا مش العباية بس ، خد ادى العباية ، وادى الهدوم ،
وآدى الجزم ايه ، خد ، خد .. خليك تروح ماترجع ..
(تقذفه بالاحذية)

المعلم : الله ، ياوليه يا مجنونة ، انت ياولية (تنهال الملابس على
راسه والجزم فوق رأس المعلم الذى يحاول ان يدنح هذه
الأشياء بيده ويقول) طيب روحى .. طالقة بالتلاتة ..
(تنزل الستار ببطء شديد فى خلال القاء الملابس وتصميم
المعلم على الطلاق)

الفصل الثامن

المنظر : (نفس المنظر السابق - صباح أحد الأيام قبل شروق الشمس ، عزوز على الدكة مختفى تحت الملاية صابح يعد القهوة)

عزوز : وهو يختفى تحت الملاية - انت ياوادي جريولى ..

جريولى : نعمين يا معلمى ..

عزوز : فتحت خلاص يا واد ..

جريولى : ايوه يا معلمى ..

عزوز : طيب تعالى ..

جريولى : (مقتريا من المعلم) .. نعم يا معلم ..

عزوز : انتك على كتوف رجلية يا واد ، ايوه يا سلام عضى زى مايكون فيه كلبة مسعورة ..

جريولى : (بهدوء) انا عاوز خمسة جنيه يا معلم ..

المعلم : اياك عايز تتجوز تانى ، يا اخى جتك نيلة يعنى بطل قوى ..
مش تحمد ربنا اللى مراتك ماتت ..

جريولى : لا يا معلم ، هو مين دا ، اللى يتجوز تانى ، لهرانا مجنون اعملها تانى ..

عزوز : امال عاوز خمسة جنيه ليه ياووله ..

جربولى : انا عاوز خمسة جنيه من غير مؤاخذه علشان اطلع بزابورت ..

عزوز : (وقد اعتدل فى جلسته) .. تطلع بزابورت ليه ..

جربولى : توكل افندى - سافر برة ورجع اتعدل حاله والحنة كلها اتجنتت من يوم ما رجع والناس كلها بتسمى علشان تسافر والواد زينهم هيسافر ..

عزوز : طيب وانت زى زينهم ، زينهم صايح ، مالوش متوة ، لكن انت جرسون قد الدنيا ، ثم تسافر وتسيب القهوة ليه ..

جربولى : البركة فيك برضه يا معلم ، ثم انا مش ها اغيب كثير ، يا دوب سنة وارجع تانى ..

المعلم : بقى يا واد يا حمار حد يسيب بلده ويهاجر هناك لو عييت هاتلاقى حد يقف جانبك، ولو جعت هاتلاقى اللي يدبك لقمة هتروح تعمل ايه فى البلاد دى ، وانت لوجعت هناك تموت من الجوع ..

جربولى : وهو فيه حد ييجوع هناك يا معلم ، دنا هارجع معايا الف جنيه وحنة عربية مرشيدس اعملها تاكسى بييجيب خمسين جنيه فى اليوم يا معلم ..

المعلم : وهاتجيب الحاجات دى منين يا ناصح ..

جربولى : ها اشتغل واحوش ..

عزوز : وانت فاهم ان شغلك هاييجيب لك الحاجات دى كلها ..

جربولى : ماهر كل الناس اللي يتروح بتشتغل وتيجيب ..

المعلم : صحيح انك مغفل يا واد ، العالم بتجيب الحاجات دى من حاجة تانية انت ماسمعتش عمك توكل افندى لما ار على كل حاجة ..

جربولى : ار على ايه يا معلمى ..

المعلم : ماسمعتوش وهو بيتكلم فى الكندشة ..

جربولى : ابوه سمعته ..

المعلم : طيب ازاي مافهمتش (يضره) امال عامل جدع ومفتح ، اناك .. اناك .. اناك .. قوى احسن عضمى زى ما يكون فيه كلبة سمرانة ..

جربولى : على فكرة ، انت مافيكش قسوة خائص يامعلم ، انت بمنظر
وبس من غير مؤاخذه يا معلم ، زى الطور من غير مؤاخذه
بس يامعلم انت مافيكش مروة .. عضمك مسوس يا معلم .

المعلم : يرمى الملاية بعيدا ويقفز من فوق الدكة ثائرا خلاص بقيت
دكتور . انت راخر فتحت عيادة ، مانكتب لى روشة
احسن ، واللى خلق الخلق لاكون مكسر عضمك علشان
اوريك ، انا عندى مروة والا لا (ينهاى عليه ضربا ويصرخ
جربولى ويجرى مبتعدا عن المعلم)
(تخرج زوجة توكل)

حكمت : صباح الخير يا معلم عزوز ..

المعلم : اهلا يا ست حكمت شرفتى الحنة ونورتها ..

حكمت : منورة باملها ياخويا ، ازى الدام ؟ اياك تكون المسدام
كويسة ..

المعلم : يدوم عزك يا ست هانم ، والله بينى وبينك الصحة مش
كويسة والواحد ركبى بتنشر عليه زى ماتكون مخوخة ،
انجر يا واد هات حاجة ساقعة للست حكمت .

حكمت : لا وحياتك يامعلم ، انا ماقدرش اشرب حاجة ابدا ..

المعلم : لازم تشربى حاجة ساقعة ..

جربولى : (بصوت منخفض) أزوزة ياست حكمت ..

الزوجة : لا ، كتر خيرك يا جربولى انا اصلى لسه شاربة عصير
.. الخلاط عندى بيعمل عصير فضلة خيرك .. اقمعد
بالعافية يامعلم ..

جربولى : بقولك ايه ياست هانم ، لامؤاخذه كنت عاوز اعمل بزابورت
علشان اسافر لكن مش عارف اعمل ايه ..

المعلم : انجر ياواد خش جوة بلاش قلة ادب ..
(يبلضم جربولى ويدخل القهوة)

المعلم : بقولك ايه يا ست حكمت هانم ، انا طالع فى دماغى كده
اتوكل على الله ..

حكمت : تتوكل على الله فىن ياخويا ، بعد الشر عليك ..

المعلم : لا انا عاوز اسافر يعنى فى ايها حنة .

حكمت : تتوكل على الله ياخويا ، بعد الشر عليك ٠٠ آه ياخويا ٠٠
بعد الشر عنك ٠٠

المعلم : حاكم انا طالع فى دماغى آخذ لى سنة والا اتنين فى ايها
حتة افتح حتة قهوة اعلى قرشين وآجى مصر ابنلى حتة
عمارة على البحر واجيب لى حتة مرشيدس كمان ٠٠ يعنى
تاخذ كام الشغلانة دى ٠٠

حكمت : متاخذش ياخويا ، شغلانة ايه قصدك ؟

المعلم : شغلانة البازيور ٠٠

حكمت : ما دام اشتريت الورق ورحت عند مجتمع التحرير وطلعت
السلام ٠٠ وكلمت الصول ٠٠ يبقى كله تمام ٠٠

المعلم : بينى وبينك انا رحمت مجتمع التحرير وكلمت الصول ، بس
ما جاوبنيش ٠٠

حكمت : باذن الله كل حاجة تخلص ٠٠ بس قول يارب ٠٠

المعلم : ربنا يخليكى يا ست هانم ، والله ماكنت عارف تعمل ايه ٠٠

حكمت : وهى دى ياخويا حاجات صعبة ، دا كل الناس تعرفها
افرتك بعافية بقى يا معلم ٠٠ (تدخل) ٠٠

المعلم : مع السلامة يا ست ٠٠ (يكلم نفسه) اتصور ، لا اتهدم
الأول واتصور ٠٠ واروح المجتمع واشترى الورق واطلع
السلم ، وادوخ ، واكلم الصول مايجوبنيش ٠٠ بسيطة
(يتجه نحو الدكة) انت ياواد يا جربولى ٠٠

جربولى : نعمين يا معلمى ٠٠

المعلم : تعالى يا واد اترك على العضمة دى ٠٠
(تخرج نبوية من المنزل وتنتج ناحية القهوة ٠٠ يكشف
المعلم وجودها فيطرح جربولى جاثبا ويفظر اليها بشراسة)

المعلم : ايه اللى جابك الوقت دا على الصبح ٠٠

نبوية : (متريضة) نعم ؟

المعلم : نعم الله عليكى ٠٠ ما بتسمعيش والا ايه ؟

نبوية : لا ما باسمعش ، طرشت اى خدمة ؟

المعلم : يااولية اطلعى فوق ، خلىنا نعرف نشوف اكل عيشنا ٠٠

نبوية : اكل عيشكو دا ايه يادلعدي ، هو فين اكل عيشكو ده ..
دى القهوة اللي كانت بتصفى عشرة جنيه كل يوم مايقتش
بتعمل ببريزة يا معلم ..

المعلم : انت هاتحاسبينا ..

نبوية : هو انا ما احسبك ويس ، دانا ما احاسبك واجرجرك فى
حديد ..

المعلم : طيب والنبي تنهوى وتروحي كده بلاش كلام فارغ ..

نبوية : اتهوى اروح فين انت ناسي انها قهوتى يا معلم ..

المعلم : بقى دى قهوتك ياولية ، دى كانت اربع حيطان وعملتها
ولا الشرتون ..

نبوية : بقى كانت اربع حيطان يا ضلالى ، القهوة اللي سلمتها
لك وفيها كراسى بالمصنف وفيها شيش بنور لما تقعد تمانين
سنة مش هاتحصل واحدة منها .. كانت اربع حيطان
يا عزوز ..

المعلم : لا كانت روف جاردل ..

جربولى : ماتقصرى الشر ياست ام امام خلينا نشوف شغلنا ..

نبوية : (تلهقه بالقلم وتخطف منه المفاتيح) شغلك دا ايه ياواد
انت يا صايح يا ضايح ، انتو بتوع شغل انتو ..

جربولى : انت بتضربيني ليه الوقت ، انا ماباشتغلس عندك انا باشتغل
عند المعلم .. المفاتيح بتاع المعلم ..

نبوية : المعلم مالوش مفاتيح ، المعلم سلم المفاتيح من زمان ..

المعلم : اذا كانت القهوة مكتوبة باسم المعلم ، مكتوبة قدامك امه ،
قهوة المعلم عزوز مش قهوة ام امام ، انت مايتعرفيش
تقرى ..

نبوية : لا الحمد لله لا بقرا ولا يكتب اتفضل اتهوى من هنا ..

جربولى : اتهوى اروح فين ، انا واقف جنب المعلم ..

نبوية : طيب وادى المعلم يتاعك راخر ..

(تقذف الدكة بعيدا عن القهوة)

المعلم : الله ، اوعى تحطى ايديك على الدكة ..

نبوية : اتفضل خذ دكتك وروح من هنا ..

- المعلم :** احطها فى الحقة اللى تعجبنى
تيسوية : قلتلك مش هاتحطها يا عزوز اتفضل اتهوى من هنا ..
- المعلم :** اللهم اخزيك يا شيطان طيب يا ام امام ما ابقاش عزوز
 ان ما وريتك ..
- تيسوية :** هتورينى ايه يا حسرة ، انت معاك حاجة توريبها لى ياشيخ
 اتوكل ، جتك وكسة من دون الرجالة ، قال يعنى شملول
 قوى .
- المعلم :** يضرب جربولى بالقلم .
- جربولى :** بتضربنى ليه يا معلم ..
- المعلم :** شيل الدكة حطها هنا جنب الحيطه (صائحا) هى ..
 مش خدت قهوتك خليها تفرقضها ، واحنا كمان لازم نثبت
 ان احنا رجالة .. انت راجل والا لا يا واد ؟
- جربولى :** انت ادري يا معلم ، طول النهار ادعك لك فى عضمك ..
 كليت ؟
- المعلم :** فكرتنى يا واد ، تعالى ، انت لى على العضمة اللى فى
 رقبتي دى ..
- جربولى :** خدامك يا معلم ..
- المعلم :** نعمل رجالة الاول ، اجري استاضى لنا باجور جاز من
 عند ايها حد ومات لنا براد شاي من ايها حد وكام كباية
 من ايها حد وكم كنكة قهوة وكم فنجال من عند ايها حد
 واستلف لنا كام صينية كمان ..
- جربولى :** منين يا معلم ..
- المعلم :** امال راجل ازاي يا واد ، من ايها حد اخلق من الهوا ،
 جرسوم قليل الحيلة صحيح ..
- جربولى :** حاضر يا معلمى (يخرج مسرعا) .
- (ينظر المعلم للدكة ويجلس عليها وينظر فى اتجاه القهوة)**
 واللى خلق الخلق لاثبت لك ان انا عزوز ابن شلبية ..
 يانا يانت يانبوية فى الحقة دى ..
- جيسر :** صباح الخير يا معلم (ينتبه الى التغيير) الله بسم الله
 الرحمن الرحيم .. انا غلطت فى العنوان والا ايه ، ايه
 الحكاية ادى الحيطه والدكة بتبقى هنا جنبها ، طيب ادى

الحيطة امال فين الدكة ، دا عمر تانى بلوقت ولتلت
حاجات دول جنب بعض الحيطة والدكة وانعلم والاكتة
التلاتة شبه بعض ..

(تخرج نبوية من القهوة وقد شمعت عن ساعديها)

نبوية : انت بتخرف تقول ايه يا واد يا جبر ..

جبر : اهلا ست ام امام ايه اللى نزلك الصبح بدرى بالشكل ده ..

نبوية : حكم الزمان ..

جبر : (يجلس) امال المعلم فين ؟

نبوية : المعلم ساب القهوة ..

جبر : ساب القهوة ؟ ودا معقول ، هو فيه قهوة من غير معلم ..

نبوية : يعنى كل قهوة وفيها معلم ، والا كل معلم معلم ..

جبر : والنبي دا فيه معلمين الواحد منهم بصراحة مايستاهل بصلة

نبوية : خلاص يبقى مش المهم المعلم ، المهم الشغل ..

جبر : هو طلق صحيح ..

نبوية : (وهي تدخل القهوة) قال بركة يا جامع ..

جبر : ولا يهكم يا معلمة تعالى رايحه فين ؟

نبوية : عاوز حاجة يا جبر ، اعملك شاي ..

جبر : ولا تتعبى نفسك انت (يسحب كرسي ويضعه فى مكان دكة

المعلم القديم) اقعدى انت هنا زى الملكة انا خدامك انا

مبقى معاكى هنا لحد ماتشوفى حد يساعدك ..

نبوية : لا مالوش لزوم يا جبر ..

جبر : لا والنبي انت واحدة ست برضه ، مايصعش نسيبك لوحدك

(اعمل واحد شاي مينة وصلحه)

(يدخل جبرولى ومعه مستلزمات القهوة الجديدة لابسا

بيجامة) ..

جبرولى : يا معلم .. معلم ..

المعلم : وهو نائم .. ايه يا واد جرى ايه ؟

جبرولى : جيت العدة امه يا معلم وترابيزة كمان ..

المعلم : طيب يلا ولع قوام واعملى واحد شاي مضبوط ..

جبرولى : حاضر يا معلمى ، بقول ايه يا معلمى ..

المعلم : عاوز ايه تانى يا زفت ..
جربولى : اجيب الواد الخريط يكتبلنا يافطة عا الحيطه ..
عزوز : لا .. مش دلوقتى .. سيبنى لما اصحى واشرب الشاى
ويضرب فى نفوضى وانا حفكر حته دين تفكيره ليها العجاب
(يدخل زينهم مرتديا ملابس نظيفة)
زينهم : (ينفجر ضاحكا) الله .. انتو البتوما صيفى ولا ايه ياواد
ياجربولى ..
جربولى : متصطيح يا واد يا زينهم ..
زينهم : ايه الحكاية ياواد فهمنى ..
جربولى : ايه اقعد بس اقعد ..
زينهم : اما اروح اجيب كرسى ..
جربولى : لا مطر حش ناحية هناك ..
زينهم : امال عايزنى اقعد على الارض ..
جربولى : يا معلم .. يا معلم .. يا معلم ..
عزوز : ميروح يقعد فى ستين داهية .. لازم تقلقوا منامى ..
جربولى : اتزحزح كده شوية عشان فيه زبون عايز يقعد ..
عزوز : فيه ايه ياواد تانى ..
جربولى : دا زينهم يا معلم ..
عزوز : يعنى زينهم باشا .. عاوز ايه ياواد يا زينهم ..
زينهم : الله .. ايه الحكاية يا معلم ؟ .. انا جاي اشرب شاى قبد
ما روح المطار مسافر النهاردة ..
عزوز : خلاص روح اتلق هناك وجميعتك الشاى ..
نبوية : اذا كان حيتلق هنا .. يبقى يشرب الشاى من هنا ..
عزوز : حيتلق عندك .. ويشرب الشاى من هنا ..
نبوية : انت يا جبر .. جبر ..
جبر : ايوه حاضر .. نعمين يا معلمة ..
نبوية : اعمل شاى لزينهم ..
جبر : زينهم .. انت لسه مسفرتش ..
زينهم : انا مسافر النهاردة .. بس آجى اشرب الشاى قبل مطلع

المطار .. لكن قوللى ياوله .. انت اشتغلت جرسوم
والا ايه ..

جبر : جرسوم .. فشر دى خخدمة لوجه الله عثمان ست
وحدانية فيه زعل بينها وبين المعلم .. طلقها .. دى حكاية
كبيرة حبقى احكيها لك بعدين اجبك الشاى ..

جربولى : الشاى يا زينهم .. والتبى مقتناش تشوفلى شغلة فى
بين التهدين عثمان ابعد عن ايد المعلم الثقيلة .. وشه
النكد ده ..

نبوية : خد شايك وارجع ياواد تانى ..

جبر : (يحضر الشاى) الشاى يا زينهم ..

(يمد زينهم يده لياخذ الشاى من جبر)

جربولى : قسما برب العزة ان مديت ايدك على شايمم لاخلى المعلم
يقوم بهرسك تحت رجليه ..
(يترك زينهم شاى جبر فوراً)

نبوية : امسك الشاى واشربه احسن احط بوزك فى القراب ..

زينهم : (يمد يده نحو كوب الشاى)

جربولى : واللى خلق الخلق ان ماشريت شاى لاخلى المعلم يطفحك
الدم ..

(يتراجع زينهم)

جبر : امسك الشاى يابنى آدم ماكنتش افكر ان لنا شغلة عندك
(يمد زينهم يده لياخذ الشاى)

جربولى : انت هتشرب من عندهم برضه يامعلم ، يامعلم ..

زينهم : (لاطما على وجهه) يا جدعان خلصونى انا فى عرض النبى ،
الطيارة معادها هيقت ..

جبر : امسك الشاى ..

جربولى : خد الشاى بتاعنا احسن لك ..

زينهم : يا جدعان خلصونى ..

المعلم : ايه الدوشة دى ياواد ..

جربولى : الواد زينهم طالب الشاى ومش عاوز يشربه ..

المعلم : ومش عاوز يشربه ليه ..

نبوية : مادام الزبون متلقح على قهوتنا يبقى لازم طلباته مز
عندنا ..

المعلم : الزبون يقعد فى الحقة اللى على كيفه ويشرب من الحقة
اللى على كيفه .

جبر : (يحضر الشاى) الشاى يا زينهم ..

(يمد زينهم يده لياخذ الشاى من جبر)

جربولى : الواد زينهم طالب الشاى ومش عاوز يشربه .

نبوية : دا مين اللى قال كده ..

المعلم : انا المعلم وانا اللى يقول كده ..

نبوية : (ضحكة ساخرة) معلم ؟؟

المعلم : اقصرى الشر يا نبوية احسن انا ..

نبوية : انت ايه يامعلم ؟ انت ايه والنبي ؟

المعلم : يافتاح يا عليم .. يا رزاق يا كريم ، اقصرى الشر على
الصبح احسن لك ..

زينهم : يا جدعان مش عاوز اشرب شاى ، معاد الطيارة زمانه
هايفوتنى ..

المعلم : عنك ما طفحتك .. لكن متدفع حقه ..

زينهم : ادفع حقه منين ؟ انا معيش فلوس مصرى تاخذوا فلوس
انجليزى ..

المعلم : معكش فلوس مصرى يعنى ايه (ينال عليه ضربا)

جبر : ايوه ناخد ، معاك فلوس ايه ، استرليكي ، دونارات ايه
اللى معاك ..

زينهم : يا جدعان حرام عليكم ، اعتقونى لوجه الله ، ابوس رجلك
يا معلم سيبنى ..

(يخرج توكل مرتديا بيجامه وروب دى شامبر)

توكل : ياناس حرام عليكم .. الواحد لسه هايغمض عينه ..

نبوية : يخلصك يا توكل افندى ، يخلصك الزبون يبقى قاعد عتدى
وعاوز يسقيه هو الشاى ..

توكل : ياست نبوية عيب اللى بتعملوه ده العسرية المرشيدس
بتاعتى فى الأجانس والنهاردة الضهر هاروح اجيبها
وعاوز اناام ساعتين ..

- زینهم** : معلش یا توکل افندی خش انت ریح جنبك خش .
- توكل** : ابعد ايدك القذرة دى عنى اللى زيک فى بلاد بره لازم يحطوه فى الكارتينا . .
- زینهم** : طيب خش ماترعلش نفسك خش . . (يلتقط البجه بسرعة ويطلق هاربا فى اثره جبر وجربولى)
- المعلم** : اهو الزبون جرى علشان يعجبك يا توکل افندی . .
- توكل** : دى احوالكم اللى بقت عجب ، انا لازم اكلم سعادة المحافظ يشوف له حل معاكو . .
- المعلم** : والله عندك حق ، ثم كمان القهوة دى مالهاش تصريح . . ولايصحش كمان يكون فيه قهوة فى حارة زى دى كفايا قوى حته تراييزة زى دى . .
- قبووية** : لا حقانى قوى يا معلم . .
- المعلم** : ايوه . . ولازم اقول الجد ولو على نفسى . .
- توكل** : دى آخر مرة اسمح فيها بالشجار . .
- المعلم** : هو فين الشجر ده يا توکل افندی يعنى شايف الجناين ما شاء الله فى الحارة . .
- توكل** : لازم الناس يكون قلبها على قلب بعض يا معلم اذا راجل عيان وصحتى على قدى طول الليل صاحى ولا دقت طعم الاكل وحياتك انت مادقت حاجة غير صنف العصير المكسر شغال على طول عندى بعصر واشرب . .
- المعلم** : شوية برد ويكره تروق اقعد اشرب شاي . .
- توكل** : عارف لو شربت شاي مش ها انا . .
- المعلم** : لادا شاي من الجمعية حلو قوى تشربه تنام بعون الله . . زى مايكون مافيش فيه ريحة الشاي . .
- توكل** : لكن ايه الحكاية يا معلم . انتوا قسمتمو القهوة نصين . . والا ايه . .
- المعلم** : لا من غير مؤاخذه اصله حصل شوية زعل كده وبمعدن حصل انعزال . .
- توكل** : قصدك انك سبتت القهوة يعنى خلاص .
- المعلم** : آه سببتها . .

- توكسل :** ويعدين ناوى تعمل ايه ..
- المعلم :** اعمل ايه ازاي بقى ، منا فاتح قهوة ايه
- توكسل :** قصدك الدكة دى قهوة ..
- المعلم :** قهوة ونص طبعا ايه مالها ؟
- توكسل :** وانت فاهم ماتنجم بالشكل ده ..
- المعلم :** انا ناوى اجيب دكة ثانية ..
- توكسل :** دا انت لازم تعمل حاجات كثير يا معلم ..
- المعلم :** قوللى اعمل ايه وانا اعمل ..
- توكسل :** يعنى لازم تبين للناس انك فاتح قهوة .. بتختلف اختلاف جذرى فى الشكل والمضمون من القهوة اللى انت ساييها .
- المعلم :** ايوه انا نختلف ، حاكم الولية دى مجنونة وهو اصل الخلاف ايه ؟ عاوزانى اقعد والزق جنبها زى الولية الخاية طول النهار وطول الليل انا مادام ورايا شغل لازم انام جنبه .
- توكسل :** لنا مش قصدى الخلاف ده ، انا قصدى لازم تعمل قهوة مختلفة عن القهوة دى ..
- المعلم :** طيب منا عامل كده ..
- توكسل :** فين اللى انت عاملة ده ؟
- فين الديكور ؟ فين التنسيق ؟ الكرسي شكل الستائر ، الارضى شكل الشيش شكل الصوانى شكل ، بعدين يبقى لازم فيه هارمنى بين كل الحاجات دى ..
- المعلم :** الواد جربولى هو اللى له دعوة بالحاجات دى انا ماليش دعوة بالحاجات دى انا المعلم ، انا اناام ويس .
- توكسل :** يا اخى انتوا ، متنكروا نايمين لامتى ، ماتيجى بره القهاوى بتعمل ازاي القهوة بتتكلف ميت الف جنيه ، الجرسون لابس اشكال والوان ، التراييزات رخام طليانى ، العدة نحاس .. الحيطه عليها ميت لوحه ..
- المعلم :** هو كل برغوت على قد دمه وكل واحد ومقدرته ثم احنا منجيب الحاجات دى مئين ..
- توكسل :** ما اوتت لما تتكلف فلوس ماتكسب فلوس بدل الزبون مايدفع قرش فى القهوة يدفع شلن ..

المعلم : هاو الواد زينهم هرب دلوقت علشان قرش صاغ

توككل : اسمع ، تسمح لى اساعدك •

المعلم : دنا ابوس ايدك وتساعدنى ••

توككل : طيب انا هاوريك ازاي تعمل شيء جميل بحاجة بسيطة

(يدخل الى المنزل)

(يدخل جبر ومن خلفه جريولى الاها)

نيسوية : ايه يا جبر ••

جبر : لحقته ابن الهرمة بعد ما قطع قلبى

المعلم : جيت الفلوس ياواد يا جريولى •

جريولى : خد منه الشلم ومش عاوز يدينى حق الشاى ••

المعلم : الله الله ، ليه يكتش هاكلنا خمة يا واد يا جبر

جبر : انا خدت منه شلم بس ، نص افرنك حق الشاى وتلاته صاغ

كانوا عليه من زمان ••

المعلم : قب بالمتلاته صاغ احسن واللى خلق الخلق اعملك زرع

بصل •

نيسوية : مين اللى يعمله زرع بصل ده ؟ طيب الراجل اللى فى وشه

شنب يمصد ايده عليه ••

المعلم : (يمسك جبر) بقولك قب بالفلوس ••

نيسوية : (تنمزه) سيب يا معلم واقصر الشر (ويتراجع خائفا)

(يخرج توككل من المنزل ومعه بعض الصور وشاكوش

وبعض قطع القماش)

توككل : احنا مش هنبطل خناق والا ايه ، مافيش حد فى بلاد بره

بيخانق •• ابدأ كل واحد يشوف شغله •

المعلم : ماهى بلاد بره فيها عالم بنى آمنين ، لكن دول ناس

بعيد عنك •

توككل : الخناق دا ياخويا يا معلم انت بتضيع فيه مجهود كبير

كان لازم تضيعه فى الانتاج •

المعلم : انتاج ايه ياخويا ، هو انا باشتغل فى السима

توككل : ايه كنت دلوقت عملت لك خمس ست شاى ••

المعلم : هى قين الزباين بس وانا اعمل ••

توكسل : ماهى الزباين اللى كانت جاية هربت من الخناق ده ..
المسائل بياخد بعضها برقاب بعض ، تتخافق تطفش الزباين
تخسر فلوس ، تنتج تيجى زباين تكسب فلوس ..

المعلم : والنبي انت فكرتى بالمرجل اللى كان بيقول زمان كده
تملك ، كده تولع .. تشتري منه بعون الله لاتلاقى تسليك
ولا توليع ..

توكسل : انا هاثبت لك بالطريق العملى ان الانسان يستطيع انه ينتج
تحت ظل اى ظروف ، تعالى امسك الكرسي ده ..
(يمسك المعلم الكرسي ويصعد توكسل ويبدأ فى تعليق
الصور والستائر)

المعلم : (ينظر للصور) ميت حلاوة ، اهو كده الشغل (ينظر
لجبر) والنبي يابن القرعة لاخلبك تعمل شئ على الشمس
قبوية : ماتردش عليه يا جبر ، سيبه يعض فى الأرض ، تعالى
اقعد هنا .. (يجلس جبر بجوارها) اما اقوم اعمل شئ
صلح هدمك كده واقعد وحط رجل على رجل (قدخل
القهوة)

توكسل : ايه رايك بقى يامعلم ..
المعلم : آخر براوة ، منظر حلو قوى ، بس الزباين هتقعد فين ؟
توكسل : اسمع هاجيلك واجيب كرسيين موقتا لبركه وبعدى انت
لازم تتصرف ..

المعلم : ياسلام (ينظر لجبر) احنا قهوة افرنجى يافلاح .
توكسل : (يحضر معه فوطة) ادى كرسي ، يتخط هنا .. ولا اخليه
هنا ثانية واحدة (يدخل) .

المعلم : (ينظر لجبر) تعرف لو ماسبتش القهوة واللى خلق الخلق
لاكسر لك رجلك ..

توكسل : (يخرج ومعه شئ آخر) وادى كرسي كمان ينحط هنا
شوف بقى المنظر يامعلم بس خد بالك ، الكرسي يتوسخ مش
حيحصل كويس ناقص ايه نضافة انت ياواد يا جرسون .
جربولى : ايوه يا توكسل افندى ..

توكسل : هات كوز فيه ميه وشوف اى شجرة وازرعها هنا .
جربولى : ان كان على الرش بسيطة لكن ها اجيب شجرة منين ؟

المعلم : هات شجرة من عند ابيها حد وان مالتكنش روح عند
التروماى فيه شجرة هناك ياواد روح اقطعها وتعالى .

جربولى : اقطعها ازاي دى بتاعت الحكومة ..

المعلم : طيب ما الحكومة بتقطعهم ..

جربولى : ايوه دى حكومة تقطع على كيفها لكن انا ايه ..

المعلم : قوللهم انا باشتغل عند عزوز ..

نبوية : (تخرج من القهوة ومعهما كوز) .. انا ماخطف رجلى اجيد
جاز وارجع على طول خليك قاعد مطرحك ماتعبرش هـ
منهم انشا الله يارب ياكلوا فى هدمهم ..

جيسر : لا انا مش هتكلم علشان خاطرك انت بس ..

(تقتصرف نبوية ومعهما الكوز)

توكسل : (لجربولى المنهمك فى العمل) ما تملك همة ياواد انت
مالك قلبك ميت كده ليه ..

جربولى : مانا برش ايه ..

المعلم : طيب يالا شيل علشان تروح تجيب الشجرة ..

توكسل : طيب اخرس داهية تاخذك ..

جربولى : وانا هاجيب شجرة منين ..

المعلم : دا اصله الواد ده رمة .. تعالى معايا نخطف رجلنا
نجيب الشجرة ..

توكسل : وانا هاجى معاك اعمل ايه ..

المعلم : انت تنقى الشجرة اللى على كيفك وانا اقطعها ..

توكسل : اى شجرة يا اخى ..

المعلم : الله .. مش لازم تنفع الدنكور ..

توكسل : مش مشكلة بس ماتكنش شجرة كبيرة .. تبقى شجرة
صغيرة ، المهم تعمل منظر ..

المعلم : خلاص انا ما اخطف رجلى اجيب الشجرة ، خن باللك
من القهوة ياواد لحد ما ارجع ..

توكسل : انت يا واد يا جرسون ..

جربولى : نعم ..

توكسل : انت تعرف مانقطة قهوة تقع على الكرسي هاقطع رقبتك ،
فاهم ..

جربولى : ما تقطعوا رقتى ..

توكسل : انت يتقول ايه ؟

جربولى : ماقلتش حاجة انت سمعتنى قلت حاجة مانا مكتوم امه .

توكسل : ايوه انكتم ..

جربولى : حاضر ..

توكسل : انا رايح اريح جنبى شويه اياك اسمع صوت بقى (يدخل) .
(تدخل فواكه المسرح)

فواكه : دبة .. اسعاف .. دبة لوتارية ..

جربولى : جتك دبة لما تاكلك ..

فواكه : صباح الخير ياواد يا جربولى ..

جربولى : صباح الزفت على عنيكى ماحدش خرب بيت المعلم الا انت
.. مرة زى الحرياية صحيح قال الحق معشوق مات ..

فواكه : طيب وانا ذنبى ايه ياواد يا جربولى اذا كنا قعدنا نقلب
فيه ساعتين وهو ساكت ..

جيسر : الله هو معشوق افندى مامتش يابت .. لا حول ولا
قوة الا بالله ..

فواكه : آمو زى الفل بيطلع وينزل زى العفريت ..

جيسر : هاتى كرسي وتعالى اقعدى ..

(تحضر كرسي وتجلس بجوار جيسر)

فواكه : انت مالك عامل كده ليه ..

جيسر : الواد زينهم الله يخرب بيته وقع قلبى ..

فواكه : طيب تقوم تصلح نفسك كده وانت قاعد زى الفرخة الدايدة

جيسر : والله ماقدار اقوم يا فواكه ضهرى اتمزع بعيد عنك زى
مايكون حد ضاربنى بسكينة ، هو القميص اتقطع ..

فواكه : (تتحسس ظهره بيدها) لا .. مش مقطوع ..

جيسر : ايوه اتكى على الحتة دى قوى .. الله ياسلام يا فواكه
عندى حنة ينظلون هولانكة انما متفصل عليكى ..

توكسل : انت تعرف مانقطة قهوة تقع على الكرسى ماقطع رقبتك ،
فامم ..

جربولى : ما تقطعوا رقبتي ..

توكسل : انت بتقول ايه ؟

جربولى : ماقلتش حاجة انت سمعتنى قلت حاجة مانا مكتوم ايه .

توكسل : ايوه انكهم ..

جربولى : حاضر ..

توكسل : انا رايح اريح جنبى شوية اياك اسمع صوت بقى (يدخل) .
(تدخل فواكه المسرح)

فواكه : دبة .. اسعاف .. دبة لوتارية ..

جربولى : جتك دبة لما تاكلك ..

فواكه : صباح الخير ياواد يا جربولى ..

جربولى : صباح الزفت على عنيكى ماحدش خرب بيت المعلم الا انت
.. مرة زى الحراية صحيح قال الحق معشوق مات ..

فواكه : طيب وانا ذنبى ايه ياواد يا جربولى اذا كنا قعدنا نقلب
فيه ساعتين وهو ساكت ..

جيسر : الله هو معشوق افندى مماشش يابت .. لا حول ولا
قوة الا بالله ..

فواكه : آهو زى الفل بيطلع وينزل زى العفريت ..

جيسر : هاتى كرسى وتعالى اقعدى ..

(تحضر كرسى وتجلس بجوار جيسر)

فواكه : انت مالك عامل كده ليه ..

جيسر : الواد زينهم الله يخرب بيته وقع قلبى ..

فواكه : طيب تقوم تصلح نفسك كده وانت قاعد زى الفرخة الداخية

جيسر : والله ماقادار اقوم يا فواكه ضهرى اتمزع بعيد عنك زى
مايكون حد ضاربنى بسكينة ، هو القميمص اقطع ..

فواكه : (تتحسس ظهره بيدها) لا .. مش مقطوع ..

جيسر : ايوه اتكى على الحطة دى قوى .. الله ياسلام يا فواكه
عندى حطة بنظلون هولانكة انما متفصل عليكى ..

فـواكه : صحيح والنبي يا جبر ..

جبر : اديهوك دلوقتى بش اتكى قوى .. واد يا جبرولى .

جبرولى : عاوز ايه ..

جبر : على فكرة الواد زينهم هايبت لك عقد عمل من بين النهدين

جبرولى : صحيح .. انت كلمته ..

جبر : آه .. انا كلمته ..

جبرولى : بس البزابورت يعنى والحاجات دى ..

جبر : ولا يهكم انا بقى اسلفك قرشين تبعت لى بيهم حاجات من
هناك ..

جبرولى : انا خدامك ياسى جبر ..

جبر : خد ياواد سيجارة كنتك ..

جبرولى : يدوم عزك ياسى جبر .. طول عمرك مجدع ..

جبر : مانت تقف عند راس الشارع تشرب السجاير الكنتك اللى
انا مديهاك وتتكيف وخذ بالك من المعلمة لما تيجى تدى لى
اشارة ..

(بيتعد جبرولى)

فـواكه : ومندينى البنطلون بكام ..

جبر : وهو اخنا بينا وبين بعض حساب يا فواكه ..

فـواكه : بس انا هديك اللى معايا وتقسط لى الباقي ..

جبر : معاكى معكيش ماحدش لابسك غيرك .. ايوه فوق .. فوق
شوية والنبي يا فواكه عند كتفى ..

فـواكه : معنديكش قميص من اللى بيلمع ده يا جبر ..

جبر : لو سمعتى كلامى يبقى عندك بدل القميص ميه .. وبدل
البنطلون دسنة وتلبسى قباقيب من ام ترتز .. وشـمرك
تكويه كمان ..

فـواكه : (ضاحكة) يعنى انا هروح عند الواد عبد الفضيل يكويلى
شعرى كمان ..

جبر : عبد الفضيل مين يا هيلة .. انت تروحي عند الكوافير
قى بيروت ..

فـواكه : وانا بس هروح بيروت دى اعمل ايه ..

جبر : تعملى فنانة ..

- فـواكه :** وهو انا اعرف افنن °
- جـبر :** يابت يا عبيطة دا هناك يچی ستميت بنت كانوا كلهم بيلموا
سبارس هناك كلهم اشتغلوا فنانين فى بيروت °°
- فـواكه :** وهوا الفنانين ده مش يحتاج تعليم برضه ياسى جبر °°
- جـبر :** بقى انت صغيرة ماتعرفيش تقعدى تشرى وتتمازجى
وتتساهرى °°
- فـواكه :** (مندهشة) وهو ده الفن ياسى جبر °° مزاج وسهارة؟
- جـبر :** وهو فيه فن بعد كده °°
- فـواكه :** طيب وانا هاطلع بزبورت ازى °°
- جـبر :** مالكيش دعوة انت ، انا هاطلك البزابورت واقطع التذكرة
والبسك ليس ما تحلميش بيه ابدا °°
- فـواكه :** طيب اذا كنت ضامن اننا نرجع ومعانا قرشين انا معنديش
مانع °°
- (تدخل نبوية من الجهة المقابلة للجهة التى يقف فيها
جربولى فتؤخذ بالمنظر وتقف)
- جـبر :** على العموم اصبرى شوية لأن فيه مشروع تانى قدامى °°
- فـواكه :** مشروع ايه يا جبر °°
- جـبر :** المرة نبوية المعلم طلقها وقاعدة وحدانية فى القهوة
وبرضه تحتاج لراجل °°
- فـواكه :** وهو انت قد الشغل فى القهوة دا يهد الحيل °°
- جـبر :** هو انا ها اشتغل فى القهوة دا انا ها اناام على الدكة طول
النهار واجيب واد جرسون يشتغل وهو اللى يفتح السدم
والايراد نقسمه انا وهيه °°
- فـواكه :** اوعى تلف عقلك وتتجوزك °°
- جـبر :** اعوز بالله هو انا قد ام اربعة واربعين دى °° دا المعلم
عزوز اللى زى الطور الصومالى جابت داغه °°
- (يتقهقر جربولى فى اتجاه جبر وفواكه)
- جربولى :** ماتخلص بقى يا جبر الراجل زمانه جاى °°
- جـبر :** خلاص يا واد ، اصبر خمسة بس °°
- جربولى :** والنبي تخلص بقى يا جبر لو شافك متبقى داهية (يصطدم
بنبوية فيفزع) ياهه (يصبح مذعورا)

جبر : (يبهض مرعاً) به ياواد ، المعلم جه (يفاجا بنسوية
والشيشب فى يدها)

نسوية : معلم مين يا ضايح يا ضايح والنبي ماحد شارب من دمك
الا انا ..

(تنهال عليه ضربا بالشيشب بينما يسرع جريولى بنقل
الدكة الى مكانها . يهرب جبر وفواكه - تدخل نسوية
القهوة - يعود جبر الى المسرح .. يراه جريولى)

جريولى : تسمح تغور من هنا الوقت ده يقى ..

جبر : الشنطة بتاعتى جوه ، روح هاتنا لى يا جريولى ..

نسوية : فين الشنل الى انت خدته من الواد زينهم ..

جبر : اهه .. يخرج ورقة بعشرة صاغ يعطيها لها .. اتفضلى
عشرة صاغ اهه ..

نسوية : (تأخذها) مات خش خد الشنطة (يرفع يديه وهو داخل
ليحمى وجهه فتضربه بالشيشب ويسمع صراخه من الداخل
وهى تنهال عليه ضربا - فى لحظة خروجه مسرعا يدخل
المعلم ممسكا بيده شجرة فى حجم عود البرسيم .. (يخرج
جبر مسرعا من المسرح وينهمك المعلم فى غرس الشجرة)

المعلم : ايه الحكاية ياواد يا جريولى ..

جريولى : اصله كان عاوز ياكل الشلم يامعلم الى خده من زينهم ..

المعلم : وبعدين ..

جريولى : خدته المعلمة منه ..

المعلم : روح هات منها ثلاثة صاغ .

جريولى : حاضر يا معلمى .. يتقدم نحو القهوة انت يا ست ام امام

نسوية : عاوز ايه يا واد ..

جريولى : انت مش خدت الشلم من الواد جبر ..

نسوية : آه .. وعاوز ايه يا واد ..

جريولى : هاتى الثلاثة صاغ بتوعنا ..

تضربه بالشيشب ..

جريولى : الله بتضربينى ليه دلوقتى ..

(يدخل معشوق متكئا على عصا)

اعوذ بالله طول ماحنا فى الحقة دى مش هانشوف خير

ابدا ..

معشوق : صباح الخير مش كده اعوذ بالله العظيم لازم اعزل من
من هنا خالص .. دا شيء لا يطاق ..

المعلم : اهلا معشوق افندى ازيك يا معشوق افندى ..

معشوق : انتوا بتزعقوا على الصبح ليه بس ..

المعلم : عاوزة تاكل ثلاثة صاغ وانا ماحدش ياكلنى ابدا ..

معشوق : طيب تعالى يا معلم اقم .. شلن ايه ياسيدى وبلاش
زعيق ..

المعلم : لا انا ما اخدش فلوس من حد انا لازم آخذ فلوسى ..

معشوق : ياسيدى منا هبقى احاسيها ..

المعلم : اه .. ان كان كده معلش .. اعملنا اتنين شاي يا واد
يا جريولى ..

جريولى : حاضر يا معلمى (يتصرف لعمل الشاي)

معشوق : (متلفتا لما حدث فى الغرزة) اش اش ايه دا كله ..

المعلم : دا دنكور ..

معشوق : لكن دا مين اللى شار عليك بالحكاية دى ..

جريولى : دى تفانين بلاد برة بقاعة عم توكل افندى ..

المعلم : هو انتوا مش عاوزين تترقوا ، عاوز عمرك تتنك جرسوم
بلدى ، طيب ايه رايك انا ها اجيبك بدلة ..

جريولى : يا ريت بامعلمى ، عاوز فائلة كمان والنبي ..

المعلم : شوف البطر بتاع الناس ، بقولك هاجيبك بدلة تقوللى
وفائلة كمان ..

جريولى : وهلبس البدلة على اللحم يا معلمى ..

المعلم : شوف الجهل وهى البدلة تتلبس الا على اللحم ، دى حتى
ما يبقا الهاش طعم الا على اللحم ..

جريولى : وهلبس بدلة وانا حافى يا معلم ..

المعلم : وهو يعنى حد هيشوفك حافى والا لابس .. انت كفاية قوى
بدلة ويمباخ تترسم آخر رسم ..

جريولى : لا انا مش عاوز بمباخ انا عاوز بدلة ..

المعلم : انت اصلك صنف نمرود واللى خلق الخلق لاکون
مكسر دماغك ..

توكسل : ازى صحتك الوقت يا معشوق افندى ..
 معشوق : والله الصحة مش عال يا توكل افندى ..
 توكسل : مش متروح عند دكتور ..
 معشوق : والله رحت لما غلبت ، وفى الآخر القومسيون كتب لى
 اسافر برة ..
 توكسل : خلاص ، يبقى هنيا لك ما دام رحت بره تبقى هاترجع صاغ
 سليم زى الجنيه الذهب ، نكاترة ايه ومستشفيات ايه ..
 ممرضات ايه ادوية ايه .. دا الميث يقرم ..
 معشوق : صحيح يا توكل افندى ..
 توكسل : طبعا ..
 المعلم : يعنى لو اى حاجة من غير مؤاخذه ميتة خلاص تقوم ..
 توكسل : والله يامعلم الطب هناك بيعمل المعجزات ..
 المعلم : يعنى من غير مؤاخذه اى حاجة ميتة تقوم لو الواحد
 يروح بلاد بره ..
 توكسل : آه طبعا ، تقوم وبس ، دى تقوم وتجري ..
 توكسل : وهاتروح لوحك يا معشوق افندى ..
 معشوق : واعمل ايه .. الدنيا هناك غالية قوى .. المرافق هيكلفنى
 كتير ..
 توكسل : بس هاتروح تطلش لوحك ازاي فى البلاد دى انت راجل
 عيان وعاوز اللى يشيلك ..
 معشوق : وادى الله وادى حكمته .. يا توكل افندى الفلوس اللى
 معايا يادوب تكفينى ..
 المعلم : والله انا مستعد اروح معاك ولا عاوز ابيض ولا اسود ..
 وادى انت اللقمة اللى بتاكلها تقسمها سوا وخلاص ..
 معشوق : انا حتى لوخذت واحد معايا يامعلم على الاقل يكون بيعرف
 انجليزى علشان يسال عن المستشفى ويسال عن الدكتور ..
 المعلم : وهى دى عاوزة سؤالات ، شفتى اسبانيا ، شفتى حكيم ،
 تمشى ، ثم انا اعرف انجليزى كتير ، كان هنا عساكر
 انجليز فى مصر زمان ولا بد هانقابل منهم ناس كتير ، كان
 منهم عيال جددان ولاد بلد كانوا اصحابى .. الروح
 بالروح علمتهم عربى واللى خلقك ..

معشوق : والله يامعلم انا رايج غضب عنى ، انا يعنى ايه اللى
ودانى غير الشديد القوى .

المعلم : اطلع من دول بقى يا معشوق افندى دا انت رايج حنة
يا عم هتيا لك .. الكندشة فيها على ودينه ..

توكسل : هى العالم دى اللى اخترعت الكندشة ..

المعلم : عالم ناقصة داهية تاخدهم ..

توكسل : انا عارف انت بتزعل ليه من الكندشة ..

المعلم : اعود بالله .. ربنا يكفيننا الشر يا اخى ..

توكسل : ده قصر ديل يا معلم ..

المعلم : ايه يعنى قصر ديل .. قصدك ايه ؟

توكسل : قصدى انك مش طاييل .. ولا معشوق افندى طاييل .. ولا
انا طاييل .. ولو احنا قادرين نكندش كل حنة كنا كندشناها

المعلم : انت معلش .. لكن انا لا .. كل واحد يتكلم على نفسه ..

توكسل : وزعلان قوى كده ايه يا معلم .. خلاص يا سيدى ..
انت متكندش .

المعلم : ايوه بكندش طبعا .. والا انت بتسمع كلام الولية المجنونة
دى .. (لنبرية) عاجبك السمعة اللى انت عملها لى دى ..

توكسل : لا .. ده شئ لا يطاق .. قسما بالله العظيم لانا ماشى
ماشى من هنا .. حسييلكم الحنة وامشى .. ياللا يا حكمت
.. ياللا يا سمرة (يخرج)

المعلم : انا كمان لازم امشى .. انا لازم اروح معاك لندن ..

معشوق : حتروح ازاي يا معلم ؟ الحاجات دى عاوزه ترتيب .

المعلم : ايه يعنى عاوزه ترتيب ؟ .. انا لازم اسافر معاك مش
ممکن اسبيك لوحداك ثم يعنى سر .. قلت البلاد دى لازم
فيها سر .. اللى خلا توكل العدمان عرف يكدش هناك
يبقى لازم فيها سر .. قلت ايه .. ان كان االبزبورت انا
حطلمه .. وان كان عالفلوس الصعبة انا برضه جعفر
ادبر قرشين .. لازم اسافر لندن ..

معشوق : حتسافر تعمل ايه بس يامعلم وتسبب شغلك هنا ..

المعلم : ملعون ابو الشغل .. انا لازم اسافر معاك .. وادى شغلنى
اه (يرفص الترابيزة) ملعون ابو الشغل لأبر اللى
يشغلوه .. انا لازم اسافر لنندم ..

معشوق : مهو بس يا معلم عزوز ..
المعلم : .. مفيش بس ولا حاجة .. انت ياواد يا جريولى ..

جريولى : نعمين يا معلمى ؟
المعلم : خد عدة الشاى دى واتصرف فيها ادبها لايبها خد ..
وانت ياولية يالى اسمك نبوية خدى الدكة دى .. انا
خلاص مسافر .. سلامو عليكو .. سلامو عليكو يا توكل
افندى (يرقص فرجا) سلامو عليكو .. ان كنت مسافر
خدى معاك (ينطلق خارجا من المسرح)
(يخرج توكل واسرته)

جريولى : على فين يا توكل افندى ..
توكل : رايحين نتفرج على شقة فى الزمالك ياواد اذا عجبنا
حانزل ..

جريولى : هاتوحشنا والله يا توكل افندى ..
توكل : وحش لما ياكلك ..

حكمت : انا مش مرتاحة لحكاية الزمالك دى يا توكل .. ان كنت
عاوز تعمل فينا معروف بيع المرشيدس وابنى لنا حقة بيت ..
توكل : شوف الولية المجنونة ابيع المرشيدس دول بيقولو قوت على
عدوك معرش ولا تقوتش مكرش ..
جريولى : (يضحك بهستيريا) حلو معرش دى .. اما صحيح راجل
معرش ..

توكل : اخرس يا بغل صحيح اهل اللغة كانوا على حق لما سموا
الجرسون النابل وتختصر احيانا وتبقى ندل .. ندل ،
عالم رعاى صحيح (ناظرا لابنته) .. والست امك عايزه
تكرمك هنا لكن مش ممكن القعد فى حقة زى دى .. انا مش
ممكن اعاشر اندال زى كده .. انا حاجة تانية خالص ..
انا شىء مختلف .. مختلف تماما .. انا راجل ببص لفوق
فوق ..

حكمت : والنبي دالى ببص لفوق يتعب .. الناس ببص لقدام معرش
لكن لفوق ..

نبوية : (هى واجريولى على المسرح) شيل يا واد الحاجات دى
دخلها القهورة .. خش شوف شغلك واصلب طولك خد بالك
من القهورة القرش اللى بييجى منها بالنص .. افانثيح بتاعة
القهورة اهه .. فتح عنيك ..

جربولى : قصصك ...

نبوية : ... قصدى الى قلتهولك ..

جربولى : بس انا كنت عاوز امشى ..

نبوية : طب متمشى فى ستين داهية .. انا مسكاك .. بس متبقاش
تتأخر ..

جربولى : لا انا قصدى يعنى .. انا عاوز اسافر ..

نبوية : تسافر فين ؟

جربولى : بين الهندين يا معلمة عاوز احوش قرشين وارسم نفسى ..

نبوية : حتى انت ياسى جربولى ؟

جربولى : ما هو توكل افندى راح وجاب المرشيدس والواد زينهم راح

وانا عاوز اسافر انا راخر الم قرشين كده من غير مؤاخذه

وابنى حته بيت على البحر واجيب حته مرشيدس واعملها

تاكسى واصرف بقى على كيفى بقى واكل لحمة بقى زى

منا عاوز .. شوفى طول النهار اكل لحمة طول النهار

وطول الليل اكل لحمة .. اكل لحمة على طول واشترى

علبة سجائر عشرين وابعزق بقى وافنجر ..

نبوية : متفنجر ..

جربولى : هو انا اقل من مين يعنى ؟ دا توكل مكانش لاقى بهرش

تعالى اتفرجى عليه عقبال املتك .. الوقتى مايباكلش

غير عيش مفقع والجينة دى ما يجبهاش الا دوبل كريم ..

نبوية : هى الناس جرالها ايه ؟ اتجننوا والا ايه الناس ركبها

عفريت اسمه مرشيدس طيب اركب جزمة الاول الحقة

مالها يا اخواتى جرالها ايه اتشقلب كيانهام ليه .. توكل

من يوم ما رجع من السفر والناس ركبها ميت عفريت هو ايه

الى زاد على توكل وايه الى زاد على مراته وايه الى زاد

على بنته حتى الهدوم الى لايساها مش خايلة عليها ..

البت عرت ركبها شوية وتوكل نفسه عمل ايه قلع البسدة

المزينة وليس بدلة جديدة شوية وهو الراجل بايه (تضحك)

الله يمسك بالخير يا عزوز .. صحيح هو الراجل بايه ؟

بالبدلة الجديدة ؟ ياما رجالة لابسين بدل وهم من جوه قش

طيب وعاوز تروح انت راخر يا جربولى ..

جربولى : هو انا كفرت ياخاله نبوية ماكل الناس بتدور على حالها

هو توكل مش بيدور على حاله ..

نبوية : ياواد انت حاجة وتوكل حاجة تانية .. توكل تشيله من الأرض دى وتحطه فى الأرض دى مايجرلوش حاجة ياواد توكل زى القصب مالوش أرض ، تشيله من هنا ترميه هناك مايحصلش حاجة لكن انت زى القمح تقلعه من الأرض روحه تطلع معاه شايف الشجرة بتاعة المعلم يمسيه بالخير عزوز شوف نشفت ودبلك ازاي ..

جربولى : منا ناشف ودبلان ايه هانشف تانى اكثر من كده يمكن دى مش أرضى يا خالة نبوية آه صح يمكن الاقى أرضى يمكن لما اغرس فى الطين هناك ازرع واخضر وافرض نشفت هانشف ايه تانى عن كده فيه نشوفية اكثر من كده يا عالم دنا حاسس لو قعدت هنا كمان سنتين هتيجوا تدوروا عليه ماتلاقونيش لو قعدت هنا مش حاموت هاخلص علشان كده بقول اروح وهانخسر ايه لما اروح منا مش خسران حاجة .

نبوية : على راك ياواد يا جربولى مين عارف ارضك فين ويا عالم أرض اى واحد فينا فين .. روح ياواد يا جربولى روح زى مانت عاوز اשמعنى انت اللى متفضل هنا يمكن يبقى عندك مرشيدس وبيت على البحر ومين عارف يمكن تموت على كل حال روح احسن لك مانت ميت هنا .. دا دور وماشى على الناس الحسارة كلها اتجننت مش ناقص الا الحارة يشيلوها ياخدوها بين النهدين .. اذا كان عزوز اتخبط فى دماغه وسافر راخر .. عزوز بعد عشرين سنة خدمة من خدمة عزوز ملبسك ومهنيك وشيلة تراك على راسى من فوق .. ايه اللى جرى فى عقول الناس يا اخواتى سترك يا رب سترك علشان خاطر حبيبك النبى .. سترك علشان خاطر حبيبك النبى .
(تبكى وتدخل البيت بسرعة)

جربولى : (بعد دخولها) انا عارف هى عاملة الهولة دى كلها علشان ايه خايقة اطلع انا وماتلاقيش جرسون تانى ما الجراسيم على قفا مين يشيل فى الحارة .. ايه يعنى وقفت على جربولى وليه مجنونة صحيح .. قال ايه زعلانة على عزوز دا جرى لما كان بياكل ضرب يا قوة الله .. الاكادة اللى يشوفها وهى ماسكة الشيشب .. صحيح النسوان دى .. مية من تحت تبين علشان كده انا مارضتش اتجوز كفايا مرة واحدة نشفت المر .. انا بقيت قطاع عام دلوقت ..

(يضع يده فى جيبه جلبابه ويتمخطر ويتمخطر على المسرح)
يا سلام مافيش احسن من شغلة الجرسوم برضه .. شغلة

لجرسوم اربيع المعلمة برضه مسئولة .. امال بقى الى
يشتغل وزير يعمل ايه الله يكون فى عونته .. شوف مسؤل
بن كام قهوة وكام جرسوم ياه حاجة تهersh المنح ..

الزبون : قوم ياواد هات واحد شاى ..

جربولى : معاك فلوس ..

الزبون : ايه يعنى فلوس .. هات عالتوتة ..

جربولى : ما معكش ..

الزبون : معيش ..

جربولى : وانا مش قايم .. خش انت اعمل الشاى واعملنى واحد

شاى انا راخر ..

الزبون : حاضر يا معلم (بهم يدخل القهوة)

جربولى : تعالى ياواد ..

الزبون : نعم يا معلمى ..

جربولى : (ينام على الدكة) اتك لى ياواد على العضمة دى .. اتك

على السنسنة (يدعك له ظهره) تحت شوية .. ايوه ..

تحت اوى ياد .. كمان ياوله اتك زى الناس يا جرسوم

خرج يالى مافيكش مروة .. يلعن أبوك ..

(يدخل عزوز ويفاجأ بالمتظر فينهال ضربا على الاثنين

بينما يدوران حول نفسيهما على المسرح وعزوز فى

اثرهما يكيل لهما الضربات وصراخهما يتصاعد الى

عنان السماء)

عزوز : ايه اللى بتعمله ده يابن الهرمة انت وهوه .. اياك فاكر

نفسك معلم ..

جربولى : (بشدة) ويتضرب ليه دلوقتى انت يا معلم ..

عزوز : بتبوق فيه يا واد ..

جربولى : آه .. أبوق فيك .. ايه .. عاوز منى ايه .. انت مالكش

ضرب عليه دلوقتى ..

عزوز : بتبوق فيه ياواد يا جربولى ..

جربولى : آه أبوق فيك قللتك قبل كده .. الله ..

عزوز : (يجلس) طيب معلش .. اطلع هات العباية من فوق ..

جربولى : (للزبون) اطلع ياواد هات العباية من فوق ..

عزوز : (يضرب جريولى) انا قلت انت ..
جريولى : طيب ويضرب ليه دلوقتى ..
عزوز : طيب معلش .. اطلع هات العباية ..
جريولى : انا ماحدش يضربنى ايدا .. آه .. ماحدش يضربنى غير
المعلمة .. آه يكون فى معلومك .. بعد كده الللى يضربنى
المعلمة بس واياها حد يضربنى تانى انا لازم اقول للمعلمة .
نبوية : (تطل من البلكونة) .. فيه ايه ياواد يا جريولى ..
جريولى : الراجل ده نازل فيه تلطيش انا والجرسوم بتاعى ..
نبوية : راجل .. راجل مين ياواد .. استنى انا نازل لك (تخفى)
جريولى : وشرف النبى الللى يعد ايده على لازم اجيب كرشه ..
عزوز : بقى انت تجيب كرشى ..
جريولى : آه .. اهو الللى يضربنى اجيب كرشه .. ثم انا المعلم
بتاع القهوة دلوقتى ماحدش يضربنى ايدا .. اما اكون
جرسوم معلش .. لكن معلم يضرب معلم .. تضرب
معلم ازاي انت ..
نبوية : ايه ياواد الحكاية .. فى الراجل ده .. مين عزوز .. ايه
الللى جابك تانى .. اتفضل اتهوى من هنا ..
عزوز : انا ح اتهوى على طول بس ادينى العباية
نبوية : العباية ما انت خدتها ..
عزوز : انا ماخدتهاش .. انتى رميتلى الهدوم بس .. العباية
لسه عندك ..
نبوية : هافيش عبيان عندى .. اتفضل من هنا ..
عزوز : ياويله اقصرى الشر واطلعى هاتى العباية من فوق .. انا
رايح لندن والدنيا برد هناك ..
نبوية : لندن ايه ياراجل الللى انت رايحها .. انت اتجننت فى عقلك
عزوز : انا رايح مع معشوق وقطعنا التذاكر والبزابررت وكل
حاجة جاهرة وهو مستننى فى استنجية ..
نبوية : ومش عيب يا راجل تروح استنجية بهدومك المقرحة دى ..
المعلم : ماحدش له دعوة بيه ..
نبوية : ورايح لندن وسايب بيتك وسايب قهوتك ، اروح لمن
يا اخواتى ..

المعلم : انا ماليش بيت وماليش قهوة وماليش حد خالص ٠٠ هه
نبوية : يا راجل اطلع فوق غير هدمك وأعمل زى الرجالة اللى
خلقهم ربنا ٠٠ انت مش مكسوف من نفسك ٠٠

المعلم : الله ٠٠ ٠٠ انت هاتفتحلى محضر ٠٠
نبوية : يبقى مش عيب يا راجل بعد السن ده تتجنن فى عقلك وتدور
تتصرمع فى الشوارع ورا معشوق ، وهو انت زى
معشوق ٠٠

المعلم : هه مش عاوز عيبى (يقف ويهم بالانصراف)
نبوية : انت فاهم الحكاية ايه ٠٠ انت اياك فاهم نفسك عيل صغير
وطايش ، وسيدنا النبى مانت منقول من هنا ولاكون شارية
من دمك ٠٠

(تخلع نبوية الشبشب وتمسك عزوز من جلبابه من الخلف
وتطرحه ارضا وتنهال عليه ضربا)

نبوية : تعالى يا واد يا جربولى ٠٠ طلع الرزية دا معايا ٠٠
المعلم : مش طالع ، جاى ٠٠ جاى مش طالع ٠٠
جربولى : (بزغدة) هاتطلع غصب عنك ٠٠

المعلم : انت بتضرب ياواد يا جربولى ، ودين النبى لاكون شارب
من دمك ٠٠

جربولى : اخرس لاديك على بوزك على طول ٠٠

المعلم : مش طالع ، اتكلم هنا ، لكن فوق لا ، ها اصور قتيل لكن
مش طالع ٠٠ والله لا صور قتيل هنا ٠٠
(ينهض ثائرا يصرخ فى نبوية وجربولى يزج من القهوة
ويمسك كرسيها ويهم بضربهما وهما بين صارخ وهارب)

(ستار)

الفصل الثالث

المنظر : (نفس المنظر - الجربولى يفتح القهوة .. يوقظ عطوة)

جربولى : قم يا واد انت يا واد رش قدام القهوة وولع النار وانا
مغنى عنيه شوية .

عطوة : (ينهض بتكاسل) حاضر ..

(يتمدد جربولى على الدكة ويغطى جسده بالملاية بينما

يتهمك عطوة فى العمل .. يدخل توكل لابسا ملايس قديمة

وتميصا متسخا - خلال دخوله يصييه زذاذ من رش

عطوة)

توكل : ماتحاسب جتك الغم ، الا انتوا ايه ؟ متفضلوا حمير

طول عمركوا ..

عطوة : املاسى توكل افندى .. متاخذنيش ..

(يتوجه توكل ناحية الدكة ليجلس)

عطوة : حاسب يا سعادة البيه دا المعلم نايم ..

توكل : (ينزع الملاية بعصبية فيفاجأ بجربولى نايم على ظهره

واضع رجلا على رجل) قوم جتك الغم (يصفغه)

جربولى : الله ؟ ايه يا توكل افندى ويتضرب ليه ؟

توكل : (يجلس ويضع رجلا على رجل وينظر لجربولى باشمئزاز

شديد جدا)

توكسل : معشوق افندى ماجاش يا ولد ؟

جربولى : (ينظر اليه صامتا)

توكسل : انت يا لوح .. يا بجم .

جربولى : (باستعلاء) بتقوللى .. انا ؛

توكسل : امال بقول للحبلة .

جربولى : آه انا مش ولد ، انا المعلم ..

توكسل : معلم ؟ طيب معشوق جه يا .. معلم ..

جربولى : لا .. معشوق ماجاش ولا عزوز ولا الواد زينهم ولا الواد

جبر جه ولا البت فواكه ، كلتهم سافروا زى مايكون انقطع

خيرهم ..

توكسل : عجايب - ولا حد فيهم بعث جواب ..

جربولى : زينهم كان قاللى مبعثك عقد عمل من بين النهدين ولا

بعث ولا حاجة ..

توكسل : انت يعنى بتتكلم بثقة زائدة قوى يا ولد ، انت بقيت شريك

فى القهوة .

جربولى : لا ، خالة نبوية مسكتها لى ، وانا جببت واد جرسوم

والشغل عال والحال كويس وحياتك .

توكسل : عفارم عليك يا واد يا جربولى .

جربولى : امال انت فاهم ايه يا توكل افندى ، واللى خلقك انا ماكان

ناقصنى غير فرصة .. ادينى قدامك ايه (يوريه الصندل

والشراب) آخر معلمة واللى خلقك وتعرف لو أمسك

فرصة كبيرة شوية واللى خلقك اشترى الشارع ده

(يسير الى ناحيته) يا توكل افندى اهو المعلم كان قد

الحبلة لكن مخ مفيش زى الطور ..

توكسل : جته داهية مطرح ما راح .. عندك حاجة مقفولة يا ولد

اشربها ..

عطوة : ايوه بس دى عايضة فلوس مقدم ..

توكسل : هو انا شحات زيك اشيل فلوس ، اكتب لك شيك لو عاوز .

جربولى : ولا شيك ولا حاجة يا توكل افندى ، دا انت ضيفنا النهاردة

هات ساقع لتوكل افندى يا ولد وشيشة المعلم .

جربولى : انت باين عليك زى ماتكون يعنى من غير مؤاخذه تعبان .

توكل : فعلا ٠٠ الصحة مش عال اليومين دول يا جريولى ٠٠
(يحضر الجرسون المصوب والحاجه الساقعة يتناولها
توكل ويشربها دفعة واحدة) ٠٠ يا سلام دا العطش كافر

جريولى : ليه ، هو الهوا بتاع الزمالك بيعمى الناس والا ايه ؟
عطوة : (يحضر شيشة لجريولى ويضع عليها النار بالقرب من
توكل - ينفخ فى النار فتطير شرارة فى اتجاه توكل)

توكل : ماتحاسب يا بهيم ٠٠
عطوة : ماتخافش يا توكل افندى - النار ماتحرقش مؤمن ٠

توكل : لا بتخرق يا بجم ٠٠
عطوة : استغفر الله العظيم ٠٠ احد هنكفر يا توكل افندى ٠٠
توكل : (ينفض نفسه) طيب غور فى داهية ، جتك البله ٠٠
جريولى : (يشرب الشيشة) طيب بدمتك ايام ماكنت ساكن فى الحقة
هنا احسن والا ايام الزمالك ٠٠

توكل : بينى وبينك يا معلم جريولى انا عرقان لشوشتى وكاتم
همى فى قلبى وساكت ، من نهار مارحت الزمالك والمقت
نازل على دماغى مش عارف الاقياها منين والا منين ٠٠
جريولى : انت مش عملت المرشيدس تاكسى ٠٠

توكل : ايوه عملتها تاكسى ، مافاتش وحياتك خمسة ايام الا
وصادمت فى عربية نقل فى طريق اسكندرية شلتها
خرده ٠٠ بعته فى وكالة البلج

جريولى : طيب انت مش كنت راجع بين النهدين تانى ٠٠
توكل : ايوه كان فيه فكرة ، لكن الله يجازى ولاد الحزام ٠٠ كنت
واخد وعد من سعادة وزير المعارف فى مملكة بين النهدين ،
ولما جه مصر هنا نزل عندى فى الشقة ، قعد شهر يجياله
وحياتك ، استلقت فى الشهر دا بييجى الف جنيه ٠

جريولى : يعنى اكرمته ٠٠
توكل : قوى ، قاعد عندى واكل شارب نايم ، مستحمى وآخر
التمة خد بعضه ومشى والمصيبة ان سمرة اختفت من نهار
ما مشى ، تبقى كارثة لو كان فرمها ترومى ٠٠

جريولى : يا راجل بعد الشر ، بكرة تظهر انشاء الله ٠٠
توكل : وبينى وبينك حكاية سمرة خلاص ، كمان كسرت وسطى
وايدى ساعات استلف وساعات ابيع لكن خلاص ، ابيع

ايه تانى خلصت كل حاجة حتى البدل ، لو حكمت عرفت
يمكن تسبب البيت وتهج ٠٠

عطوة : ريحة شياط ٠٠

توكسل : ايوه والله فيه ريحة شياط صحيح فين يا ولد ؟

جربولى : الحق يا توكل افندى جاكنتك ٠ طلى يا ولد ٠٠

توكسل : يا خير اسود ٠٠ الجاكنته - اقسام بدينى ما انا عاتقك
النهاردة الا على السجن ٠٠ الجاكنته اللى حيلتى يعلم
الله ٠٠ يخرب بيتك يا عطوة كمان الجاكنته اللى حيلتنا ٠٠
الواحد يمشى ازاي قدام الناس ياخواتى ٠٠

جربولى : ولا يهيك ٠٠ هات اما اديها لخالتي ام امام تخيطها لك ٠٠
(دخول جبر)

توكسل : ام امام ايه ونيلة ايه ، دى عاوزه واحد رفا ، ويا عالم
هتنتفع والا ماتتفعش ٠٠

جربولى : عندكش جاكنته تانى تلبسها مؤقتا كده لحد دى ما تخلص ٠

توكسل : بقولك ماعنديش ، انت ايه مابتفهمش ، هو انا لو عنسدى
جاكنته تانية كنت هوبت ناحية هنا ، دنا كنت جاي فاهم ان
معشوق افندى رجع قلت استلف منه قرشين الواحد
يغطى نفسه لحد ما تفرج ٠٠ (ينهض) لكن بينه راخر مات
هناك ، اعمل ايه بس يارب الواحد بيفكر يرمى نفسه
فى البحر ٠

جربولى : يا راجل قول لا اله الا الله ، دا ربك كبير قوى ٠٠ والله
المعظيم بكرة لتفرج ٠٠

توكسل : ادى احنا قاعدين نقول بكرة بكرة ، يظهر ان بكرة دا مش
هيبجى ابدا ٠٠ ولد يا جبر ٠٠

عطوة : اسطى جبر ٠٠

جربولى : ياخى الخالق الناطق الواد جبر بتاع الكنك ٠٠ يخلق من
الشبه ٤٤ ٠

جبر : انتز لسه مرنخين مطرحكم ، عالم وش فقر ٠٠

جربولى : الله ؟ جبر ؟

جبر : جى جى يا ولد ٠٠

- جربولى** : جى جى ، جى جى دا اسم كلب .
 (يضحك الجربولى ويخرج عطوة من القهوة يضحك هو الآخر - يتظفر اليهما جبر ويتأملهم باحتقار توكل بدھشة)
- جبر** : بتضحك ، جتك نيلة دا انت عامل زى ترمای السبتية ..
توكل : ازيك ياسى جبر ..
جبر : الله يسلمك يا توكل أفندى ..
جربولى : لكن ايه العز دا كله يا عم جى جى أفندى ..
عطوة : الفن خلاه عضمة ناشفة ..
- جبر** : (يلزقه) عضم ايه يا شفت ، انا باشقتل مخرج ..
 هاخش انشاء الله قريب فيلم انتاج مشترك بالالوان مع تركيكا ..
- جربولى** : الله - البت تركية بتاعة الفول ..
جبر : ايوه بتاعة الفول يابن الهيلة ..
 (يضرب ايده فى جيبه - يخرج نقودا كثيرة - يقع منه ربع جنيه ع الأرض - يمشي لعطوة)
 مات الفلوس دى يا ولد - ماتها يابن الفقيرة .
 (ينحلى عطوة ياتى الفلوس ويعطيها لجبر)
- جبر** : خليها لك يا بن الصايعة .
عطوة : (فرحا) ربنا يخليك يا جبر بيه ..
جبر : جى جى يابن الجاملة لهفت الربع جنيه .
عطوة : ربنا يخليك ياسى جبر بك ..
- جبر** : اضرب تعظيم سلام لى يابن الفقيرة . اتعلم اللحلة .
 (يفتح جبر المجلة التى معه)
 آخر عدد من مجلة النجمة شايف صورى على الغلاف .
 يا أهبل ..
- جربولى** : يدقق فى الصور المنشورة ..
 لازم عملت حادثة هناك ..
جبر : عملت فيلم يابن السكة ..
توكل : اياك تكون حققت النجاح المرجو يا استاذ جبر ..
جبر : آخر فيلم يا توكل أفندى كان قنبلة ، رجل وتلت امرات .

توكسل : يا سلام دا فيلم هادف ..

جبر : انت شفته ؟

توكسل : لا ، لكن الكتاب يعرف من عنوانه يا استاذ جبر ..

جربولى : من حق ، البت فواكه فين ؟

جبر : ما تفكرينش ..

جربولى : لسه بتبيع ورقة برضه ..

جبر : ايوه بتبيع ورق ، ورق اخضر ..

جربولى : ليه ؟ لقت كتز ..

جبر : الخواجة بيضون اكبر تاجر فى سوق سرسق شافها انهبل ،

قال ايه شبه المرحومة امه ..

توكسل : يا سلام ناس عندنا وفناء

جبر : واللى خلقك ينالها فيلة ع البحر ولحد الوقت عملها عشر

تفلام ..

جربولى : وعنوانها ايه ياسى جى جى افندى

جبر : ليه متبعثلها جوابات غرام ..

جربولى : ابعثلها يا اخى ، مين عارف ، يمكن نفسها تهفها على

وتبعثلى ولو الخواجة شافنى فيه فى الميه هطلع انا راخر

شبيه امه ..

جبر : يا شيخ اتلقح ، دنا على راي المثل اللى نصفقتها وخذتها

وسهرتها مع الخواجة بيضون .. ما عبرتنيش ..

توكسل : حكم ، شوف الخواجة طلع عنده وفاء ، لما لقياها شبه

امه ، عمل الواجب ، لكن هى طلعت قليلة الاصل ، صحيح

ناس معندهمش اصل ..

جبر : لكن مين ؟ انا هبلها ، انا بدور على نجمة جديدة علشان

تقوم بالبطولة فى الفيلم المشترك ولازم اخلى الخواجة

بيضون يشوفها .. وشرفى لاخلية يرمى البت فواكه فى

الشارع ، من حق سمرة بنتك فين ؟

توكسل : والله البنت طفشيت يا استاذ جبر ..

جبر : وطفشت ليه لا سمح الله ..

توكسل : والله بينى وبينك الحال مش ولايد يا استاذ جبر والبنت

خادت على مستوى معين وخايف لتكون عملت فى نفسها

حاجة ..

جبر : ولازم نجيبها من تحت الأرض ، البت طيبة وامها داعيالهلا
٠٠ هى بظلة الفيلم الجديد ويبقى حظها من السما لو
الخواجة بيضون شافها ، هيخر زى الرطل ٠٠

توكسل : معاك عربية ٠٠

جبر : وعريقتك فين ؟

توكسل : عريقتى فى وكالة البلح ٠٠

جبر : ان كان ع العزبية عريقتى الخنزيرة تحت أمرك ٠٠

توكسل : تبقى اتحلّت المشكلة ، هى لها كام بنت من اصحابها فى
مصر الجديدة يمكن تكون راحت عند واحدة فيهم ٠

جبر : مصر الجديدة ، مصر القديمة وراها ، انشا الله تكون فى
الهند لازم نجيبها ٠٠

توكسل : ربنا يكرمنا ونعتر فيها ، لكن قوللى ، انتوا مش متدفعه
عربون الاول ٠

جبر : عربون ايه ويتاع ايه ٠٠

توكسل : يعنى حسبة ميتين تلتمت جنيه كده ٠

جبر : هى دى حاجة عاوزة عرابين ، هو اول مايشوفها هيخر
زى الرطل ٠٠

توكسل : ايوه ٠٠ بس ماهى مسالة يشوفها دى ٠٠

جبر : ايه ٠٠ عيب ؟

توكسل : لا ، لا عيب ولا حاجة ، بس يعنى دى محتاجة مصاريف ٠

جبر : يا راجل قول يا ياسط ، واللى خلق الخلق لو الخواجة
بيضون شافها وحصل المراد ، هتاكل دهب ٠

جربولى : مبارك يا توكسل افندى ، بنتك حلوة (لجبر) وانت كمان يا عم
هنيالك والبنت تستاهل والله العظيم ، ولا ايه ، لابسة
فوق الركبة ٠

توكسل : طيب يللا يا استاذ جبر ٠٠ سلامو عليكى يا ولد يا جربولى
٠٠ الخنزيرة فين ٠٠

جربولى : مع السلامة يا توكسل افندى (يهمس فى اذنه) اذا ريك سهلها
ما تنساش المعلم جربولى ٠

(ينصرف الاثنان - ينظر اليهما جربولى)

جـريولى : (يصيح) اعوجها ، اعوجها يا متجلى ، العالم كله خسد
ع الكندشة ٠٠ البت فواكه راحت بلاد بره وقعت ع الخواجة
كندشها (يضحك) وعمك توكل افندى امرته راحوا بين
النهدين اتكندشوا (يضحك) والواد جبر جى جى (يضحك)
اتكندش ، والمعلم راخر تلاقيه اتكندش فى بلاد بره ،
مافاضلش الا انا ، يا سلام يا جـدعان لو اتكندش ٠٠
(يدخل معشوق)

عطوة : مين ؟ معشوق افندى ٠٠ ابن حلال ، الف حمد الله ع
السلامة ٠٠

جـريولى : اهلا يا عم معشوق افندى امال المعلم فين ؟

معشوق : هو لسه ماخرجش يا وله ٠٠

جـريولى : ماخرجش ، فيه ايه ؟

معشوق : انت مش متبطل لوع يا واد انت يا واد ٠٠

جـريولى : هو مش كان معاك فى لندن ؟

معشوق : شوف الحمار ، هو اللى زى ده ينفع يروح لندن يا وله ٠٠

جـريولى : امال كان فين ؟

معشوق : لهنتروا متعرفوش ٠٠

عطوة : هو مش سافر معاك يا معشوق افندى ٠٠

جـبر : ماتنطق ٠٠ راجل يا معشوق افندى ٠٠

معشوق : يا جماعة انتوا حتلفونى ليه ٠٠ يعنى انتو عاوزين
تفهمونى ان عزوز مش هنا ؟

جـريولى : وديت المعلم فين يا معشوق افندى ٠٠ واد يا عطوة ٠٠

عطوة : نعم يا معلمى ٠

جـريولى : تعالى ياواد امسك معايا (يمسك) فين المعلم ٠٠

جـبر : طلب يا معلم ٠

عطوة : قرب بالمعلم ٠

جـريولى : فين المعلم ٠

(نبوية تنتظر من البلكونة)

نبوية : ايه يا واد يا جريولى الحكاية ٠٠ ايه الطيطة دى ٠

جـريولى : دا سى معشوق افندى رجع من لندن والمعلم عزوز مش
معااه ٠٠

- نبوية** : معشوق .. نهاره ازرق زى النيلة .
- جربولى** : ار قبل المعلمه متيجى ..
- چير** : قب بالمعلم ..
- جربولى** : فين المعلم ..
- معشوق** : ياخونا والله ماجه معايا (تظهر نبوية هاجمة على معشوق)
- نبوية** : انت جيت يا وش الفقر .. محدش خرب بيتى الا انت ..
- معشوق** : والله ماكان قصدى ياست نبوية اللى حصل حصل غصب عنى ..
- نبوية** : بقى انت تجرجر الراجل وراك .. وتخرّب بيتى .. وتقوللى مكش قمصك ..
- معشوق** : انا حاولت افهمه بالمزوق مافيش فايده .. بالتراضى مافيش فايده .. سبته فى اللوكاندة وهربت .
- توكسل** : يعنى المعلم عزوز مرشح ل لندن .
- معشوق** : هو ده بتاع لندن .. دول خدوه من الدار للنار .. وحكموا عليه بست أشهر ..
- نبوية** : ست أشهر .. عزوز دخل السجن .
- معشوق** : هو انترا متعرفوش ..
- نبوية** : يا حبيبى يا عزوز .. يا ترى عامل ايه فى السجن يا عزوز ست أشهر يا ضنايا وانت فى السجن .. وانا غامه انك فى بلاد بره الهى يتشك فى ذراعه اللى رماك فى وسط الحرامية .. تخش انت السجن يا سيد الرجالة ..
- جربولى** : طب مقلتناش ليه .. على الاقل كنا بعقنا له علبه سجاير والا حنة حلاوة .
- معشوق** : هو انا عرفت الا بعد ما رجعت .. اصل الصول بتاع بوابة الجمر ك كشف الحكاية .. وهو عارف المعلم عزوز وشافه معايا قبل كده كذا مرة .. كتر خيريه الراجل عمل الواجب وهو فى السجن .
- نبوية** : وبعد كده ليك عين تورينا وشك .. خربت بيتنا الله يخرب بيتك ..
- معشوق** : وانا بس ذنبى ايه يا ست نبوية ؟
- نبوية** : ذنبك ايه .. مش انت اللى قعدت تزن على ودانه .

معشوق : أنا ؟

نبوية : مش انت اللي قعدت تقر ومليت دماغه

معشوق : أنا ؟

نبوية : مش انت اللي قتلته بلاد بره فيها وفيها ؟

معشوق : أنا ؟

نبوية : مش انت اللي عملت البحر طحينة ؟

معشوق : أنا ؟

نبوية : امال أنا ؟

معشوق : (بعد ان تضربه نبوية) اى اى ٠٠ الحقنى يا جربولى ٠

جربولى : سيبه بقى يا خالة نبوية ٠٠ ملوش لازمة ٠٠ احسن ده لصموه فى لندن ٠٠ احسن روحه تطلع فى ايدك يودونا فى داهية ٠

معشوق : أنا يا جربولى ؟

نبوية : ايوه انت ٠٠ ولازم اشرب من دمك الليلاى ٠

جربولى : ملوش لازمة يا خالة نبوية ٠٠ هو يعنى المعلم عزوز جلاله ايه يعنى ٠٠ بكره ييجى ٠٠ ثم يعنى محدش عارف ٠٠ عسى ان تكرهوا شيئا وهو خير لكم ٠٠ يمكن ربنا عمل فيه كده علشان يتأدب مهو كان مفترى راخر ٠

نبوية : اخرس قطع لسانك ٠٠ دا عزوز راجل ولا كل الرجالة ٠٠ هى الحقة ليها حس من غيره ٠٠ وهو كان فيه راجل فى الحقة يعلى عينه ٠٠ يا ترى انت فين يا عزوز ٠٠ يا ترى عامل ايه يا حبة عيني ٠٠ يا ترى جعان والا عطشان والا عيان ٠٠ يا ترى مين بينطيك ياخويا ٠٠ يا ترى فى انهو سجن يا حبيبي يا عزوز ٠

معشوق : فى سجن الحضرة ياست نبوية فى اسكندرية ٠

نبوية : يا حبة عيني يا عزوز (تحاول الخروج) ٠٠ هاروحله ٠٠

معشوق : حتروحى له فين ٠٠ دا خرج من زمان ٠٠ معشوق افندى بيقول حكموا عليه بست اشهر ودلوقت فات اكثر من سنة لو صبرنا شوية خلاقه طب علينا ٠

فيـوـية : لا انت اصلك متعرفش عزوز .. عزوز لو دخل السجن يوم واحد مش طالع فى حياته .. عزوز ميقبلش الامانة ابدأ لو واحد مس احساساته حيطلع روحه فى ايده .. عزوز عمره ماهو طالع من السجن ياخواتى اروح لمن ياخواتى .. اروح لمن (تخرج)

جبر : لا حول ولا قوة الا بالله .. انا عارف ايه اللى خلاك تجرحه وراك يا معشوق افندى ..

معشوق : انا ؟ .. يا عالم قولو كلمة الحق مرة .. مش كان قدامك يا توكل افندى .

توكل : انا ؟ انا مليش دعوة بالحكاية دى خالص .. ياللا بينا .. يا استاذ جبر ملناش قعاد هنا بعد كده ..

جبر : ياللا يا توكل افندى .
(ويظهر زينهم اعلى المنرج .. ويظهر ضوته قبل الدخول)

زينهم : خدى بالك يا بت يا طماطم من الحاجات لغاية منسرف حنصرها ازاي .. واذا شفتى الواد جبر خليه يستناى لغاية ماچى هو اللى حيعرف يصرفها زى الجن .. كك .. كنت .. بت يا طماطم .. اضربى العيال اللى بيلعبوا ع العربية المرشيدس خدى بالك لحد ملاقى حد يشتغل عليها .. اف ايه الحر ده .. ولد يا جرسوم .. اف ايه القهوة ويا القسرف ده ..

معشوق : واد يا زينهم .

زينهم : مين ؟ ازيك يا معشوق افندى .

معشوق : وعامل فى نفسك كده ليه يا بنى .

جبر : مش جى من بين النهندين .

توكل : اياك تكون حوشتك قرشين كويسين يا استاذ زينهم

زينهم : والله مخبش عليك يا توكل افندى .. قبضنا قرشين مش بطالين .

جربولى : لكن ليه ده كله يا واد يا زينهم ؟

زينهم : المكسب حلو يا جربولى .

جربولى : انت مش قلت لى حتبعتلى عقد عمل ؟

زينهم : ابعتك انت يا معشوق طب دا اقل راجل يسافر هناك لازم يكون عنده بكابورتوس من الجامعة ..

جربولى : طلب منت رحت ياخويا .. كان عندك برضه
البكابورتوس ده ؟

زينهم : يا واد انا خيرا .. ماتقولله والنبي يا معشوق افندى .
معشوق : انا ؟ ..

زينهم : انت مش روجت برة وشفت كل حاجة وعارف كل حاجة .
معشوق : والله بينى وبينك يا زينهم دى كانت سفيرة مهيبة على
دماغى .. ولا كان ليها اى طعم .. واللى زاد وعاد
حكاية عزوز .

زينهم : ماله عزوز .. هو فين من حق ؟

جربولى : مش سافر يا واد مع معشوق افندى لندن .

زينهم : عزوز راح لندن ؟

توككل : لا .. راح اوردن .

زينهم : ايه ده بلد تانية ده .

جربولى : لا .. راح اراميدان .

زينهم : ينهار اسود .. دخل السجن .. دا لازم اتخانى مع حد
.. حكم وش نصايب .

جبر : ولا اتخانى ولا اتعارك .. عمك معشوق جرجره وراه لحد
الميناء .. مسكوه ع المركب ودوه السجن .

معشوق : انا ؟ .. انا برضه اللي جرجرته يا جبر ؟ .. يا عالم
قولوا كلمة الحق مرة ! .

زينهم : لا حول ولا قوة الا بالله .. بقى المعلم عزوز راح السجن
دنا جاييله الدوا بتاعه ..

معشوق : جيت علب كتير ياواد يا زينهم ..

زينهم : لا والله ماجيت غير للمعلم .. انما معايا حاجات كتير اوى
لو جبر جدع يسوق لنا الحاجات دى .

جبر : انا سبت المهنة دى يا واد .. دلوقت باشتغل فى السيمة .
زينهم : ايه ؟ .. بتقعد مع الناس .

جبر : اتعد مين يا ياف .. انا باشتغل مخرج .

جربولى : ومشارك البت تركية بتاعت الفول .

زَيْنَهُم : طب وانا مبيع الحاجات دى ازاي ؟ .. دنا جايب معايا
حاجات بالوف .

توككل : المهم توعى لنفسك بقى يا استاذ زينهم .

زَيْنَهُم : انا فى دماغى مشروع جعله .. حشترى خام عربية
مرشيدس واعملهم تكس .. واقعد انا ع القهوة ..
والعب طولة .. واقبض والعب .. واقبض والعب ..

توككل : سيبك من حكاية المرشيدس دى .. انت تشتري حاجة
ثانية احسن ، فيه عمارة فى الزمالك ببيعوها دلوقت لو
معاك قرشين كويسين خدما واتوكل على الله ..

زَيْنَهُم : بس حدفك كل اللى معايا وبعدين .. انا لسه عاوز اتجوز
توككل : وماله .. ربنا يرزقك بينت الحلال وتتجوز .

زَيْنَهُم : هيه فين بس بنت الحلال دى اللى حترضى بينا .
توككل : موجودة متمثلش هم .

زَيْنَهُم : ازى بسلامتها ست سمرة .
توككل : عال الحمد لله .

زَيْنَهُم : ياسلام يا عم توكل لو ربنا يكرمى واتجوز سمرة .

توككل : متمثلش هم .. اتجدةن انت بس وسمرة خدامتك .. المهم
اشترى العمارة اللى فى الزمالك .

جبر : يللا بينا يا توكل افندى .

زَيْنَهُم : يللا على فين ؟ .. احنا لسه اتكلمنا .

جبر : حنتكلم فى ايه يامقشف انت .

زَيْنَهُم : مقشف .. انا مقشف يا جبر .. واللى خلق الخلق انا
معايا فلوس انجليزى .

جبر : ولما تكون معاك فلوس استرلينى كمان .. آل على راي
المثل .. الفلاح فلاح حتى لو اكلوه تفاح .

زَيْنَهُم : الله يرحم الشنطة ياسى جبر .. والسجاير الكنك (مقلدا)
كنك .. كنك معايا السجاير الكنك .

جبر : وايه يعنى .. انا راجل حصامى .

جربولى : مظلوط يا واد يا جبر .. انت راجل حصارى صحيح .

زَيْنَهُم : قلت ايه يا توكل افندى ..

توكسل : انا تحت امرك يا استاذ زينهم .. بس انت عارف الجواز
يحتاج مصاريف ..

جيسر : ايه الحكاية يا توكسل افندى .. انت اتخبط فى مخك والا
ايه .. مشروح فيلم مشترك مع تركية حتبوظهولنا ..
بنتك سمرة متبقى نجمة اسمها حينكتب ماشيط ع الحيطان ..
صورتها حتبقى ع الغلاف فى كل المجلات .. حسابها
فى البنك حيبقى بالالوفات .. كل ده حترميه تحت رجلك ..
واتجوزها للصايع ده .. انا مستعد اديك شيك
بميت الف ليرة على بنك انترا .. والا ايه رايك يا معشوق
افندى ..

معشوق : انا ؟

زينهم : ايوه انت ..

معشوق : انا مليش دعوة انا قايم

جربولى : وحتروح فىن ما انت قاعد معانا .

معشوق : الست مستنيانى فى البيت يا ولد .

جربولى : ست ؟ .. انت اتجوزت تانى ؟

معشوق : ايوه يا ولد .. بس ست ايه .. ليدى معشوق .. خواجه
من لندن .

جربولى : انت قادر تمشى .. انت كنت رايح تتعالج والا تتجوز .

معشوق : ماهوه ده العلاج الطبيعى يا ولد .. واحدة ست ايه ..

ممرضة تلاقيها طباخة تلاقيها .. حبيبة تلاقيها .. شغل

بره يا وله (وهو ينهض) آه يا ركبى .. لو بس مكنتش

ركبى بتطلق على .. كان الواحد مزاجه راق قوى ..

دامية تلعن ابو الرطوبة .

زينهم : طب على الطلاق بالتلاتة مانا رايح معاه ..

جيسر : طلاق مين ؟ .. ومن مين يا اقرع انت ؟

زينهم : من سمرة .

توكسل : لا .. لا .. لا .. لا .. ميصحش تجيب سيرة سمرة على

لسانك .

زينهم : ليه بقت مراتى شرعا .. مش اتفقنا .. هو الجواز ايه
الجواز بالنيات .

جبر : الشيك ايه يلا بينا .

زينهم : يلا بينا على فين . انت فاهمنى خساجة . (يرمى
البرنيطة التي يرتديها على الأرض ويمسك بخناق جبر
وتوكسل)

جبرولى : (صارخا) لا . انت وهو بقى . تقعد بادبك تقعد اللى
محفطش اديه مش هيحصله كويس .

جبر : يلا يا توكل افندى . تاكسى .

زينهم : يلا على فين . منتش منقول يا توكل افندى (ممسكا به)

توكسل : لا لا متمسكش البدلة بتعتى يا زينهم . كله كوم والبدلة
كسوم . هو ايه اللى جبرى .

جبر : (ممسكا بتوكسل) يلا يا توكل افندى .

زينهم : مابلاش يا توكل افندى . انتة فكرنى ايه . كرودية .
طب قسما بالله ثلاثة (يظهر عزوز)

جبر : (حقا زينهم) طب قسما على قسمك .

عزوز : جود مورنتج .

جبرولى : المعلم عزوز . حمد لله على سلامتك يا معلم .

عزوز : اهلا يا واد يا جبرولى ازيك .

جبر : مبروك يا معلم .

عزوز : الله يبارك فيك يا واد يا جبر .

زينهم : الف نهار ابيض يا معلم .

عزوز : اهلا ازيك يا واد يا زينهم . انت رجعت امتى من بين
التهدين .

زينهم : النهاردة يا معلم .

عزوز : والله بقيت نفسى اجيلك بس ماكاش فيه فرصة .

توكسل : ازيك يا استاذ معلم .

عزوز : اهلا ازيك يا توكل افندى ، انت رجعت الحة رالا ايه ؟

توكسل : انا فى الزمالك .

عزوز : يا سلام . اما الحة وحشتنى بشكل . كل مسالير
ميعود يوما اذا انكتبته السلامة والغيابة .

توكسل : اذا انكتب له السلامة والايبا .

والايبا يا معلم مش الغيابة .

- جربولى** : موجود كل حاجة ٠٠ والكبس والغبارة ٠٠
عزوز : غبارة ايه يا حمارة بقولك الغبارية ٠ يعنى الواحد لما يكون مسافر ويرجع يبقى يعنى يرجع بس بالنحوى ٠٠
- توكسل** : بقولك الايايا يا معلم مش الغيايا ٠
عزوز : يوه ، ماحدش اتكلم الا انت ، فيه ايايا وفيه غيايا ، مفيش غير النحوى اللى تعرفه انت ، فيه نحوى تانى ٠
- توكسل** : انت لازم اتعلمت النحوى فى الحقة اللى كنت فيها يا معلم ٠
عزوز : آه بلاد بره كلها نحوى وفيه ميت لغوه هناك دا الناس الصيع اللى زى الواد جربولى كده يتكلموا لغوة اسمها سنكج ، يعنى بتاع المناكيج بس بالانجليزى اسمها سنكج ٠
- جيسر** : ازى اللى كنت عندهم يا معلم ٠٠
عزوز : ناس اوادم ، مش عالم عرة زيكوا ٠٠
- توكسل** : واذاى معشوق يا معلم ٠٠
عزوز : ربنا يلف به بقى سبته مشتع فى الاسبتاايا ٠ خالص وغايب عن الرعى ، بيقولك لما يقوم مش هيفتكر حاجة ابداء ٠ ويمكن يلخبط فى الكلام ٠
- زينهم** : لا ، مامو لخبط فعلا يا معلم ٠
عزوز : عرفت مئين يا ولد ؟ بعث جراب ملخبط ٠
جيسر : لا يعنى مامو كان باين عليه قبل مايسافر انه ملخبط ، وانما لما بيحجى هيلخبط اكتر ٠
- عزوز** : ربنا يلف به ، آخر يوم وانا فى لندن جبته وعتين موز ورحت ازوره فى الاسبتاليا ، الدكتور قتالى ملكش دعوة بيه بقى ، سيبه وسافر انت ٠٠ قاللى سافر سيبهولنا انت، تعرف ساعة ما دخلت عليه كده هو فى المشرحة ماعرفتوش.
- زينهم** : فين يا معلم ؟
عزوز : الا فين ٠٠ فى لندن ٠٠
- زينهم** : انما انت لابس كده ليه يا معلم ٠
عزوز : هناك نظرة ياواد ليل مع نهار ٠
- زينهم** : لكن انت كنت فى لندن ذاتها والا فى اجوارها
عزوز : لا ذاتها ٠٠
جيسر : كنت نازل فين يا معلم ٠٠

عزوز : فى لوكاندة المدينة الى قدام المحطة .

جربولى : ولا بعت جواب يا معلم ولا اى حاجة .

عزوز : اصل يا واد لندن دى ماشية بنظام مش زى هنا ، نعرف الساعة ستة الصبح كل العالم تصحى فى لندن ، يفطروا ويخشوا الدورة ويروحوا يشتغلوا ، شغل م الى على ودينه هناك .. واللى يهرب ياكل على قفاه

جربولى : ايه ده ، فيه ضرب هناك يا معلم ..

عزوز : هو فيه ضرب غير فى لندن دى ، حاكم الحكومة بقاعة لندن دى يا واد جامدة قوى .

جبر : واليمك بتاع هناك كويس يا معلم .

عزوز : ايه اليمك دا يا واد ، قصدك ايه ، هه فهمنى يعنى قصدك ايه ..

جبر : انا ماقصديش حاجة يا معلم ، مافى كل حنة اليمك يعنى اكل ..

عزوز : لا فى لندن الاكل ماسموش يمك اسمه منجريا - تطلب المنجريا تجييك على طول (الجربولى يلف حوله وينظر لقفاه - ينتبه المعلم لحركة جربولى فيمسكه من جلبابه)

عزوز : بتبص على ايه يا واد ؟

جربولى : لا ، اصل يا معلم قفاهك يعنى زى ماتكون الشمس ضاربك ، هو فيه هناك شمس يعنى .

عزوز : آه طبعاً ، طول النهار الشمس طالعة وبتقدح فى الناس ، امال هما الانجليز حمر ليه ؟

جربولى : انت مش كنت بتقول طول النهار نظرة .

عزوز : آه نظرة وشمس ، بلاد ربنا كارمها امال انت فاهم ايه ..

جربولى : بس قفاهك انجليزى قوى يا معلم .
(يلف زينهم حول عزوز وينظر لقفاه)

زينهم : زى ما يكون صوابع .

جبر : زى ما يكون جرح وربنى قشره .

عزوز : دى خناقة مع واد انجليزى كنت ضربته هنا ايام الحرب ولسه فاكرنى ابن الهرمة جاب شوية عيال انجليز وستنوم ،

عند المينا في لندن لكن هو مين واللى خلقك كلتهم .. ومع
كل مش هيفلثو من ايدى ، بس لما تقوم حرب تانى .

جيريولى : وانت متعرفه ..

عزوز : آه اسمه الشاويش غطاس ..

جيري : فيه انجليزى اسمه غطاس ..

عزوز : آه .. كابتن بالانجليزى يعنى عطاس بالعربى .

جيريولى : ماتجوزتش واحدة حلوه زى معشوق افندى .

عزوز : مين قالك معشوق اتجوز يا واد .

جيريولى : لا .. انا بقول يعنى اصله راجل بقاع نسوان وديله نجس
، لازم يتحوز .

عزوز : لا لندن دى مافيهش جواز خالص .. علشان لندن مش
زى هنا .. لندن دى يا واد بلدين .. لندن للنساء ..
ولندن للرجال ..

توككل : ع العموم مبروك يا معلم .. والعود احمد .

جيري : مبروك يا معلم .. عقبال السفرية الثانية انشاء الله تبقى
طويلة شوية .

توككل : يللا يا استاذ جيري .

زينهم : يللا على فين ؟

توككل : شوف يابنى يا زينهم الشرط نور .. انا هروح لحد سمرة
انا والاستاذ جيري واسألها .. هى حرة التصرف .. ان
حببت تتجوز تبقى من نصيبك وان حببت السيمة تبقى من
نصيب جيري .. يللا يا استاذ جيري (ينصرف جيري وتوككل)

زينهم : ياللا على فين .. هو انا كرودىا
(يجرى خلفهما ويترك حاجياته)

جيريولى : الناس دى بتروح بلاد بره بتجنن يا معلم .

عزوز : لا .. بتكندش يا واد ..

جيريولى : انت اتكندشت يا معلم ..

عزوز : انا مرحتش بلاد بره يا واد (مستدركا) انا رحت لندن
وبس ..

عزوز : مش عاوز حاجة يا معلم ؟

- عزوز : عاوز اكل قول بالسمن يا واد .. ولغت محلل ..
- جربولى : هر مافيش هناك حاجات زى كده يا معلم اكلهم يقرف ..
- عزوز : اكلهم يقرف .. جتهم الغم ..
- جربولى : اخلع الباطو يا معلم ..
- عزوز : اخلع ازاي يا واد .. لازم اليس الباطو لازم اقعده عره ..
- دا جاي من لندن ..
- جربولى : اقلع الباطو لما تستريح وناكل لقمة يا معلم ..
- عزوز : (يتحسس قفاه) قلعنى يا واد ..
- (يخلعه الباطو)
- عزوز : امشى هات الفول ابو سمن بلدى ..
- جربولى : حاضر يا معلم ..
- (يدخل القهوة ويخرج ومعه زجاجة سبغة بود وقطن)
- عزوز : ايه يا واد ده ..
- جربولى : لامراخدة يا معلم .. حاجة بسيطة وتطيب بانن الله ..
- (يشمد الجرح)
- عزوز : آى ..
- جربولى : متخافش استحمل ..
- عزوز : طيب بشويش يا واد على مهلك يا واد ..
- (يطيب جربولى جروحه)
- جربولى : احمد الله يا معلم ..
- عزوز : (بصوت مختنق)
- الله يخرب بيوتهم ولاد الكلب قطعوا جلدى .. والنبي لما يكون آخر يوم من عمرى لاموتك ياواد يا شويش غطاس
- جربولى : معلش يا معلم .. اجمد .. السجن للجدةعان ..
- عزوز : سجن ايه يا واد انت ياواد ..
- جربولى : معشوق افندى كان هنا وحكى على كل حاجة يا معلم ..
- عزوز : قالكوا ع السجن ياواد ..
- جربولى : ايوه يا معلم ..

عزوز : قال لمن ؟

جریولی : للحنّة کلها ..

عزوز : نبویة عرفت ؟

جریولی : ایوه یا معلم ..

عزوز : ای یای یا ایه ..

(ییکی)

(ستار)

(المشهد الثانى)

من الفصل الثالث

يفتح الستار عن نفس المنظر - يبدو من منظر الناس والبيوت انه قد مضت فترة من الزمن بعد هذا المشهد السابق - الوقت بعد الفجر بقليل - نشاهد عقب فتح الستار حكمت زوجة توكل وقد اخفت وجهها داخلة الى المسرح وفى يدها صرة ملابس قادمة من الخارج - وفى نفس اللحظة تخرج نيسوية من المنزل ومعها صرة ملابس فى طريقها الى الشارع تتقابل المراتان وتصطدمان بعضهما البعض فتقع الصرة التى مع حكمت .

نيسوية : ايوه .. بسم الله الرحمن الرحيم .

حكمت : (تبكى) ..

نيسوية : ايه ؟ جرى حاجة كفا الله الشر ؟

حكمت : توكل ..

نيسوية : (تضرب على صدرها) ماله ؟ ..

حكمت : مالوش .. جته ستين نيلة .. الرجال اتجنن فى مخه يا ست نيسوية .

نيسوية : اتجنن ؟ كلام ايه يا ام سمرة .

حكمت : زى مايقولك كده والنبي ياخى ، باع اللى قدامه واللى وراه ، وآخر المنة جايب جبر ينيمه فى البيت قال ايه .. هاساعدنا ع المعاش .

- نبوية :** معلش ياختى ، استحملى يا ام سمرة •
- حكمت :** انا راجعة الحارة تانى ، انا مسكن فى شقتنا القديمة
تانى ، قطعت الزمالك وقطع اليوم اللي شقناها فيه •
- نبوية :** وانا ماشية يا ام سمرة •
- حكمت :** على فين يا ست نبوية •
- نبوية :** هاخد فى وشى وأهج •
- حكمت :** بعد الشر عليكى من الهيجان ، دا انت ست العاقلين •
- نبوية :** ملعون ابو العقل وملعون ابو العاقلين •
- حكمت :** سلامتك يا ست نبوية ، وانت اللى تقولى كده ، دا انت
الناس فى الحقة كلها بتضرب بيكى المثل ! •
- نبوية :** قطعت الحقة واللى فيها •• الناس كلها اتجننت يا ام
سمرة ، اسمعنى انا هعقل وعاوزانى اعقل ليه ؟
- حكمت :** والنبي يا ست ام امام الناس مافيه على لسانها حاجة الا
عقلك •• وكمالك ياست يا كاملة يا اميرة الامرا انت •
- نبوية :** وانا زهقت خلاص لاعاد فى نفس ولا عاد فى جتة تستحمل
ده • انا صحيح من هنا •• ان كان فاضللى يومين فى
الدنيا دى ، اعيشهم بعيد عن هنا •
- حكمت :** بقى انا راجعة الحقة مخصوص علشان ابقى جنبك واقعد
معاكى وانت سايبانا وماشية يا ام امام •
- نبوية :** امر ربنا يا ام سمرة •• انت جيتى بعد ما فاض بى ••
انا شاربة المر من كعائى يا ام سمرة انا لو قعدت يوم
واحد تانى هنا هموت •• لكن انا خلاص مش قاعدة ••
والنبي منا قاعدة •
- حكمت :** والحقة •• والناس اللى فى الحقة ••
- نبوية :** اقعدى بالمعافية يا ام سمرة (تحاول الانصراف - تلحق
بها حكمت وتمسك بها)
- حكمت :** يا معلم عزوز - يا معلم عزوز •
- عزوز :** ايه الخوة دى •• هو ربنا مش هيتوب علينا بقى ••
- حكمت :** الست نبوية واخدة هدومها وماشية يا معلم •• والنبي
تحوشها ياخويا ••

عزوز : ماشية على فين ؟ ايه الحكاية يا وليه يا مجنونة أنت ؟

نبوية : مجنونة !! والنبي ماحد مجنون الا انت ولا حد اتبطل فى عقله الا انت ولا حد عاوز السراية الصغرا الا انت ..

عزوز : لا حول الله .. ياولية اعقلى وخشى بيتك .. بلاش فضايح ..

نبوية : بتخاف م الفضايح يا معلم .. من امتى .. دا محدش مطلع حسنا ولا كاشف سترنا الا انت ..

عزوز : انت بالعة راديون وحترشى مخى ..

نبوية : انت مش روحك تنتلط عاوز تسافر برة جرجروك ع السجن .. مش مارقتنا ٨ شهور ورحت فى ستين داهية ورجعت حتى ماسألنش احنا عملنا ايه ؟

عزوز : معلمش .. الدور الجاى ابقى آخذ اجازة م السجن راجى اسال على حضرة جنابك العالى ..

نبوية : اهو دا اللي انت شاطر فيه .. ما انتش شاطر غير فى التناورة والكلام الفارغ .. يرحم ايام زمان .. لما قتلتك تعالى نبني بيت يا عزوز فتحت جاعورتك على زى ما يكون حتمل عملة ..

عزوز : يعنى بنيتى الابعدية ..

نبوية : ايوه بنيتك بيتين وعملتك قهوة .. وعملتك مركز ومقام يا عزوز .. البيت ده انا اللي بنياه (تتحسس طوب البيت) شيلت الطوب بتاعه طوبة طوبة على دماغى ..

عزوز : الحمد لله .. ادينى سيبتهلك ..

نبوية : ورحت فين يا عزوز .. رحمت السجن يا ضنايا .. آدى انت برضه رجعت تانى ..

عزوز : ان كان دا مزعلك اطمنى .. انا ماشى تانى ..

نبوية : طبعا .. وانت من امتى لك بيت .. من امتى لك رأى .. من امتى لك اهل .. انت زى مايكون ورقة شايها الهوا مطرح مايحطها تنحط .. ده حتى الطيارة اللي بيطيروها العيال مربوطة بفتلة .. وانت مش مربوط بحاجة يا عزوز

عزوز : ماتجيبى تخته وطباشيرة وتدينا درس احسن .. اعزتك فتحتى فصل نحو الامية ..

نبوية : وهو انت بيحوق فيك دروس .. دا انت زى ماتكون مثن
بنى آدم ..

عزوز : عندك حق .. هو انا لو كنت بنى آدم كنت استحملت المرار
دا عشرين سنة .

نبوية : المرار ، الله يكون فى عونك يا معلم .. حقه استحملت
سنين طويلة من النوم ع الدكة .. تعرف تقوللى عملت ايه
فى العشرين سنة غير النوم ع الدكة ، ايه اللى عملته فى
العشرين سنة .

عزوز : مانا معملتش .. ومش تعمل .. وروحى لى ستين داهية .
نبوية : انت صنفك ايه .. هو انت ماعندكش دم .. هو انت جبلة
عزوز : رالى خلق الخلق ان ماسكتى لاديكى على بوزك .
حكمت : صلى على النبى يا معلم .

نبوية : انت هتدينى على يوزى .. انت (تهجم عليه وتعمسك فيه
وتنزل تلطيش) .

عزوز : شاهدة يا ام سمرة .. شاهدة ..

حكمت : والنبى مالىكو حق ابدأ فى العمائل دى .. دا عيب
الحاجات دى .. الله يا خبر اسود .. الحق يا معلم .
نبوية : (تتهاربى من شدة الانفعال وتسقط ع الأرض) .

عزوز : يا خبر اسود .. ام امام .. يا ام امام .. هاتيلنا كباية
ميه م القهوة يا ام سمرة .
حكمت : اجيب الازعاف ياخويا ..

عزوز : وهى الازعاف هتيجى غير بعد سنة .. هاتى اليه الاول
(تجرى حكمت ع القهوة وعزوز يقوم بعملية تهوية من
جليابه على وجه نبوية .. ترجع حكمت بدون مياه)

حكمت : هى الكبايات فين يا معلم ؟

عزوز : صحى الراد جربولى .. هو ملقح جوه فى القهوة ..
ايوه وحياتك زى مابقولك .. صدقيني .. (تخرج حكمت
من القهوة)

حكمت : جبت الازعاف يا معلم .

عزوز : مجبتهاش انى ..

- حکمت :** بتقول ايه يا معلم .
- عزوز :** قصدى مالوش لازمة تجيب الازعاف .. هتفوق الوقت ..
انشاء الله ..
- جربولى :** يا معلم مانشفلها واحد دكتور يسعفها ..
- عزوز :** يا واد الدكتور هيعمل ايه اكتر من اللى بنعملوا احنا ..
اتلهى .. واتبه لشغلك يا رخم ..
- نبوية :** (وقد بدأت تفوق) .. آه .. آه .. انا فين ؟
- حکمت :** انت يا ختى فى وسطينا ايه وجوه عنيئا يا أم أمام ..
اسم الله عليكى وعلى حواليكى يا حبيبى ..
- نبوية :** امال فين عزوز ..
- حکمت :** عزوز ياختى واقف جنبنا ايه .
- عزوز :** انا جنبك ايه الف حمد الله على سلامتک (يساعدها على الوقوف) قومى استريحى جوه يا نبوية .
- نبوية :** انا مش داخله يا عزوز .. انا مستريحة كده .
- عزوز :** ماتخللى الليلة دى تفوت على خير ..
- حکمت :** قومى معاه يا ست نبوية .
- نبوية :** انا قلت مش قايمه يعنى مش قايمه .
- عزوز :** خلاص .. خليكى قاعدة (يضرب الجربولى)
- جربولى :** الله .. انت بتضربنى ليه .. انا عملت ايه ..
- عزوز :** انت بتزق ليه ..
- جربولى :** هو ماחדش بيزق الا انا .. مانتم عاملين تزعقوا بقالكووا
عشرين سنة لما خرمتو طبله ودانى .. هو ماחדش بيزق
الا انا .. هو آدم مش ابويا زيكم .. انتم تزعقوا وانا
ادعك فى رجلكم .. انتم تزعلوا وانا انضرب ..
- عزوز :** اياك يعنى عاوزنا نعملك ايه .. نضربك سلام .. ما انت
اتخلقت واتنشيت علشان كده .. حته جرسوم لارحت ولا
جيت ..
- جربولى :** ان كان ع الجرسوم .. مافيش جراسيم (يخلع القوطة)
- عزوز :** البس القوطة ..
- جربولى :** مش لابس القوطة ..
- عزوز :** طيب خد (يضربه) ..
- جربولى :** (يبتعد عن المعلم) ومن قاعدلكم هنا .. انا مسافر

حسافر بين النهدين واجيب تاكسى - اعوجها .. اعوجها
ياللى عوجت بديعة (يخرج)

حكمت : طيب بس قومي معايا قومي .. يا شيخة ماتنكسفيش ..
علشان خاطر سيدنا النبي ..

نبوية : اللهم صلى عليه (جالسة مكانها)
(صوت زينهم من الخارج)

زينهم : هو فين .. هو فين ؟ (داخل المسرح) انا مجنون .. انا
خائكة .. توكل خد الفلوس .. وجبر خد البت .. انا هايف
انا مجنون .. انا خائكة .. وراك يا توكل والزمن طويل
.. ياخذ الفلوس .. ياخذ البت .. ياخذ روحك .. انا
مجنون .. انا خائكة (خارجا)

(صوت توكل من الخارج)

توكل : صلى على حضرة النبي .. عشان خاطر سيدنا النبي ..
الطف بعبيدك يا رب (داخل) علشان خاطر حبيك يارب ..
انت اللى بتحكم ولا يحكم عليك .. الطف يارب ..

جربولى : توكل افندى ::

توكل : صلى على حضرة النبي .. اما اكون بسبح الواحد القهار
صلى على النبي ..

جربولى : دا باينه اتهرش فى مخه .

توكل : صلى على حضرة النبي .

جربولى : آل كان جايب مرشيدس .

توكل : صلى على حضرة النبي .. صلى على حضرة النبي ..
(يخرج) ..

عزوز : ام امام .. صلى على حضرة النبي .

نبوية : اللهم صلى عليك يا نبى .

عزوز : يا ام امام خلاص بقى حقا على .. احنا ولاد النهاردة
.. واللى فات مات .. وصلى على حضرة النبي .

نبوية : ياما سمعت الكلام ده يا عزوز .. وكل مرة تقول وترجع
تتجنن تانى ..

عزوز : انا مش مجنون يا نبوية .. انا راجل عاقل وانت عارفة .

نبوية : ولما انت عارف كان ايه اللي لطشك فى عقلك وجنتك ع السفر
بره ٠٠ فيه ايه برة اكتر من هنا يا عزوز ٠٠ واللى راحوا
بره قبل كده عملوا ايه يا عزوز ٠٠ جبر اللي رجع من بره
مشفوط فى بدلة زى قرد قطع ٠٠ اللي محدش عارف غير
ربنا هو بيشتغل ايه ٠٠ توكل افندى خد ايه ؟ كسب ايه ٠٠
وراح فين توكل ٠٠ وام سمرة ٠٠ اهي قدامك اهي ٠٠ خدت
ايه يا عزوز ٠٠ والا جابت ايه معاها ٠٠ ومعشوق اللي
جنتك ولخبط حياتك ٠٠ جاب ايه يا عزوز ٠٠ جاب خلاط
٠٠ جاب مرشيدس ٠٠ جاب خواجاية من لندن ٠٠ مش دا
الى بيحييه يا عزوز *

عزوز : خلاص يا نبوية ٠٠ انا لعاوز خلاط ولا مرشيدس ٠٠ ولا
خواجاية ٠٠ انت عندي بالدنيا يا نبوية ٠٠ ومصر عندي
بالدنيا ٠٠ اهي هفه وطلعت فى دماغى ٠٠ حرمت خلاص
ماعدتش منقول من هنا ٠٠ وحطلى كل يوم ٠٠ تعالى
وصلى على النبى ٠٠ ياللا نطلع فوق *

(يحتضنها ويسير بها نحو المنزل)

(«ستار - ختام»)

الفهرس

الصفحة

| | | |
|-----|-----------|--------------------------------------|
| ٣ | • • • • | عزبة بنايوتى (مسرحية من ثلاث فصول) |
| ٩٩ | • • • • • | النصاين (مسرحية من ثلاث فصول) |
| ١٩١ | • • • • • | الأورنس (مسرحية من ثلاث فصول) |
| ٢٦٧ | • • • • • | بين النهدين (مسرحية من ثلاث فصول) |



المركز القومي للمكتبات